

# LE OLOMATAMATA

FAASILASILAINA LE MALO O IEOVA



SU'ESU'EGA

**FEPUARI 25–MATI 3**

**Ia Lototele—E Faatasi  
leova ma Oe!**

ITULAU E 7 • PESE: 60, 23

**MATI 4–10**

**Ia Leai se Mea e  
Vavaeesea Oe  
Mai iā leova**

ITULAU E 12 • PESE: 106, 51

**MATI 11–17**

**Ia Mafuta Vavalalata  
Atu Pea iā leova**

ITULAU E 17 • PESE: 52, 65

**MATI 18–24**

**Auauna e Aunoa ma  
Faalogona Nofosala**

ITULAU E 22 • PESE: 91, 39

**MATI 25–31**

**O Toeaina—O se  
“Aufaigaluega mo  
lo Tatou Olioli”**

ITULAU E 27 • PESE: 123, 53





## HAITI

**PITO I LUMA:** O se su'esu'ega faale-Tusi Paia o loo faia i se fale i Camp Perrin, e se ulugalii ua litaea. O le to'atele o tagata Haiti sa nonofo i isi atunuu e pei o lenei ulugalii, ua toe fo'i i lo latou atunuu, ina ia auauna ai i vaipanoa o loo mana'omia tele ai le 'autala'i

FUA FAATATAU O LE 'AUTALA'I I LE FAITAU AOFA'I O TAGATA I HAITI

1:557

O LOO FAIA E LE 'AUTALA'I E

17,954

SU'ESU'EGA FAALE-TUSI PAIA E

35,735

## O LOO IAI FO'I I LENEI LOMIGA

3 Ua Lotomalilie e Ofo Atu i Latou Lava—i Nouē

32 Aogā o le Mataalia i Galuega Lelei

## SU'ESU'EGA

### ■ la Lototele—E Faatasi leova ma Oe!

Na faaalua e le to'atele o tagata o loo ta'ua i le Tusi Paia le faatuatua ma le lototele. E faamalositia i tatou e faaalua le faatuatua ma auauna iā leova ma le lototele, i lo tatou iloilo-ina lea o mea na tutupu iā i latou. O loo faamatilatila i lenei mataupu le mau o le tausaga e 2013.

### ■ la Leai se Mea e Vavaeesea Oe Mai iā leova

### ■ la Mafuta Vavalalata Atu Pea iā leova

E iai vala o o tatou olaga e lē mafai ona fai ai sa tatou filifiliga. E aofia ai o tatou mātua, o tatou uso ma tuafāfine, faapea nofoaga e tatou te fananau ai. E ese mai ai la tatou faiā ma leova. E mafai ona tatou filifili pe mafuta vavalalata atu iā te ia pe leai. O le a talanoaina i nei mataupu vala e fitu o le olaga, lea e lē tataua ona avea ma mātuaaga e vavaeeseina ai i tatou mai iā leova.

### ■ Auauna e Aunoa ma Faalogona Nofosala

E tatou te faia ni gaoioiga e mulimuli ane o tatou nofosala ai. Peita'i, e lē tataua ona avea na faalogona nofosala ma itu e faavaivaia ai i tatou i le auaunaga iā leova. I lenei mataupu, o le a tatou a'oa'oina mai ai i le faaa'oa'oga a Paulo, le auala e auauna ai iā leova e aunoa ma faalogona nofosala.

### ■ O Toeaina—O se “Aufaigaluega mo lo Tatou Olioli”

Na ta'ua e Paulo i lana tusi lona lua i le faapotopotoga i Korinito, o i latou 'o le 'aufaigaluega faatasi mo lo outou olioli.' (2 Kori. 1:24) O le ā se aafiaga o na upu i toeaina Kerisiano? E faapefea ona tatou saosaolaumea i le fiafia o le faapotopotoga? O le a talanoaina i lenei mataupu tali o na fesili.




# i Nouē



SA SOLOGA lelei le olaga na ola ai **Roald** ma **Elsebeth**, o se ulugalii ua toeitiiti atoa le ta'i 50 o o la tausaga. Sa la nonofo i Bergen, o se tasi o aai telē i Nouē. Na la auauna ma le faamaoni, faatasi ma le la fanau o **Isabel** ma **Fabian** i le faapotopotoga. Sa auauna Roald o se toeaia, avea Elsebeth o se paeonia, ae o Isabel ma Fabian o ni tagata tala'i maelega.

Peita'i, iā Setema 2009, na filifili ai le aiga e faia se suiga, e ala i le tala'i i se oganuu maotua mo se vaiaso. O lea, na faimalaga atu ai Roald, Elsebeth, ma Fabian i Nordkyn, o se tasi o tolototo i le itumalo o Finnmark, lea e i le itu i mātū o Nouē. O le taimi lenā o loo 18 tausaga o Fabian. I le aai o Kjøllefjord, na latou tala'i faatasi ai ma isi uso ma tuafāfine, o loo galulue fo'i i oganuu e mana'omia ai le fesoasoani. Na faapea mai Roald: "Na ou lagona le fiafia, ona sa mafai ona faatulaga lelei a'u fua-fuaga, ina ia maua ai le avanoa e auai ai i le tala'iga mo le vaiaso atoa." Peita'i, a o faagasolo le vaiaso, na iloa ai e Roald e sili atu mea e mafai ona latou faataunuaina. I le ā le itu?



(Itu agavale) O Roald ma Fabian  
(Pito i luga) O Elsebeth ma Isabel



## SE TULAGA E LE'I FAATALITALIA

Na faapea mai Roald: “Na faate‘ia i matou i le faapea mai o Mario, o se paeonia i Finnmark, pe e mafai ona matou siitia atu i le aai o Lakselv, e fesoasoani i se faapotopotoga e to‘a 23 le ‘autala‘i. Sa ma mafaufau ma Elsebeth e auauna i se oganuu e mana‘omia tele ai le fesoasoani. Ae na ma faatali se‘ia tuua e le fanau le aiga.” Peita‘i, i nai aso na tala‘i ai Roald i Nordkyn, na ia iloa ai le naunau o tagata e a‘oa‘oina mea e faatatau iā leova i le taimi lenei. Na ia ta‘ua atili: “Na lē maua sa‘u moe i le tele o pō ona o le lē mautonu i le mea o le a fai.” O lea, na latou faimalaga faatasi ai loa ma Mario i Lakselv, pe tusa ma le 150 maila (240 km) le mamao i le itu i saute o Kjøllefjord. Na naunau Mario e iloa e Roald ma lona aiga le tulaga o le faapotopotoga i lenā vaipanoa.

E to‘alua toeaina i le faapotopotoga i Lakselv. O se tasi o toeaina o Andreas, lea na faamatalaina iā i latou le si‘omaga o lea vaipanoa. Na talileleia i latou e le faapotopotoga, ma sa latou talosagaina Roald ma Elsebeth, pe mafai ona siitia atu i inā e fesoasoani ai i le tala‘iga. Na faapea mai ma le fiasia Andreas, ua uma ona ia faatulaga ni faatalatalanoaga mo ni galuega mo Roald ma Fabian. O le ā nei le filifiliga o le a faia e Roald ma lona aiga?

### O LE Ā SA LATOU FILIFILIGA?

Na ta‘ua e Fabian, i le taimi muamua, e le‘i iai sona faanaunauga e siitia atu i lea vaipanoa, auā ua na o se aai la‘itiiti. E lē gata i lea, o le a ia tuua fo‘i ana uō sa latou feola faatasi a‘e i le faapotopotoga, ae e le‘i mǎe‘a fo‘i ana a‘oa‘oga e avea ai o ia o se fai eletise. Peita‘i, e ese le manatu o Isabel. O le taimi lenā o loo 21 ona tausaga. Ina ua vili i ai ona mǎtua, na ia faapea mai, o lona faanaunauga lenā ua leva ona iai. Peita‘i, ina ua ia toe mafaufau i lea mataupu, sa ia lagona ai le lē mautonu. O lea, na ia faapea ifo ai: “Pe e tatau ona matou siitia i lea vaipanoa? Pe o le a ou misia a‘u uō? Pe e tatau ona suia la matou faapotopotoga, e ui o loo sologa lelei mea uma?” Ae faapefea Elsebeth? Na ia ta‘ua: “Na ou manatu o lenei tofiga e mai iā leova. Peita‘i, sa ou mafaufau fo‘i i lo matou fale e le‘i leva ona toe faafou, faapea a matou meatotino sa iai mai le 25 tausaga ua mavae.”

Ina ua mǎe‘a le vaiaso atoa sa tala‘i ai i Nordkyn, ona toe fo‘i lea o Roald ma lona aiga i Bergen. Peita‘i,

sa latou mafaufau pea i o latou uso ma tuafāfine i Lakselv, lea pe ā ma le 1,300 maila (2,100 km) le mamao mai lo latou nuu. Na faapea mai Elsebeth: “Sa ou tatalo atu pea iā leova, ma fesoota‘i pea ma a matou uō, e ala i le lafo i ai o tusi ma ata.” Na ta‘ua e Roald: “Sa mana‘omia ona ou faaalu se taimi e mafaufau loloto ai i le faai‘uga e tatau ona fai. Sa matou popole fo‘i pe mafai, ma po o le ā fo‘i le auala o le a tausia ai o matou lava mana‘oga. Ou te tatalo iā leova i le tele o taimi, ma talatalanoa ma lo‘u aiga faapea uso ta‘umatuaaina.” Na faapea mai Fabian: “O le tele o taimi e mafaufau loloto ai i lea mataupu, na ou iloa ai e lē iai se mǎfuaaga tatau o le a ou lē alu ai. Sa ou tatalo atu pea iā leova, ma na faasolosolo lava ona faamallosia ai lo‘u faanaunauga e siitia atu i se isi vaipanoa.” Ae faapefea Isabel? Ina ia nofosauni mo lo latou tofiga, sa amata ona ia paeonia i lana faapotopotoga, ma faaaluina le tele o le taimi e faia ai ana lava su‘esu‘ega totino. Ina ua mǎe‘a le ono masina talu ona ia paeonia, sa ia lagona ua ia lava tapena e siitia atu i Lakselv.

### LAASAGA NA FAIA

Sa faamallosia le faanaunauga o Roald ma lona aiga, ina ia auauna i se oganuu o loo mana‘omia tele ai le fesoasoani. O lea, ina ia ausia lo latou sini, sa iai laasaga na latou uia. E ui sa lelei le totogī o le galuega a Roald, ae sa ia talosaga pe mafai ona ave ni ona aso mǎlōlō mo le tausaga atoa. Peita‘i, sa talosagaina o ia ina ia galue faavaitaimi. E mafai ona ia galue i se faasologa e faigaluega mo vaiaso e lua, ona mǎlōlō lea mo vaiaso e ono. Na faapea mai Roald: “Sa sologa lelei mea uma, e ui lava sa faaitiitia lo‘u totogī.”

Na faapea mai Elsebeth: “Na mana‘o la‘u tane e sa‘ili so matou fale i Lakselv, ae mautotogi tagata i lo matou fale i Bergen. Na taulau manuia a matou tau-mafaiga, e ui i le tele o le taimi ma le malosi sa alu ai. Mulimuli ane, sa maua ni galuega faavaitaimi a la ma fanau, ma sa fesoasoani lea i le tausiga o lo matou aiga.”

Ua faapea mai Isabel: “Talu ai o Lakselv o se aai la‘itiiti, sa faigatā ai mo a‘u ona maua se galuega e fesoasoani ai i la‘u paeonia. E iai taimi na ou manatu ai ua lē aogā a‘u taumafaiga.” Peita‘i, o le tausaga muamua talu ona latou iai i Lakselv, sa ia galue ai i



(Itu agavale) O loo su'esu'e Knut ma Lisbeth ma se aiga i Uganda

(Pito i luga) O loo tala'i atu Marelius ma Kesia i se tagata Sami mai i Nouē

ni galuega faavaitaimi se iva. O na galuega, sa mafai ona fesoasoani i a'u tupe faaalu. Ae faapefea Fabian? Na ia ta'ua: "Ina ia mafai ona avea a'u ma fai eletise, sa mana'omia pea ona ou a'oga ma faigaluega i lea lava matātā. O le tulaga lenā sa iai i Lakselv. Mulimuli ane, sa manuia a'u su'ega, ma faigaluega faavaitaimi ai o se fai eletise."

## AUALA ESESE E FAALAU TELE AI LE AUAUNAGA

Na manana'o fo'i **Marelius** ma lana avā o **Kesia**, e auauna i se oganuu o loo mana'omia tele ai le fesoasoani. Na faapea mai Marelius, lea ua 29 nei ona tausaga: "O lauga e faia i tauaofiaga, faapea faatalatalanoaga e faatatau i le auaunaga faapaeonia, na uuna'ia ai a'u ina ia mafaufau i ni auala e faalau tele ai la'ua auaunaga." Peita'i, sa faigatā tele mo Kesia, lea ua 26 nei ona tausaga, le siitia atu i se vaipanoa e mamao ese mai i aiga. Na ia ta'ua: "Ou te lagona le faanoanoa, pe a manatu i le nofo valavala ai ma ē e pele iā te a'u." E lē gata i lea, sa faigaluega faasoloatoa Marelius, ina ia tofogi ai lo la fale. Na ia faapea mai: "Sa mafai ona ma faia le tele o suiga, ona o le tatalo atu pea iā leova mo lana fesoasoani." Muamua, sa la faaaluina le tele o le taimi i le faia o su'esu'ega faale-Tusi Paia. Mulimuli ane, sa faatau atu lo la fale, ma faamavae mai i a la galuega. Iā Aokuso 2011, na la siitia atu ai i le aai o Alta, i le itu i mātū o Nouē. Ina ia fesoasoani i le la auaunaga faapaeonia, o loo galue Marelius o se su'etusi, ae faigaluega Kesia i se faleoloa.

O **Knut** ma **Lisbeth**, o se ulugalii ua silia ma le ta'i 30 o la tausaga. Na pā'ia o la loto ina ua faitau i le *Yearbook* i tala e faatatau i ē o loo auauna i vaipanoa o loo mana'omia ai le 'autala'i. Na faapea mai Lisbeth: "O le faitau i nei tala, na uuna'ia ai i ma'ua e mafaufau e auauna i se isi atunuu. Peita'i, ou te le'i mautinoa pe mafai ona ou faia lea mea, auā e lē o se tulaga e masani ai." E ui i lea, sa la faia pea taumafaiga ina ia ausia lo la sini. Na ta'ua e Knut: "Sa faatau atu lo ma fale, ae matou nonofo faatasi ma lo'u tinā, ina ia faaitiitia ai tupe faaalu. Na ma fia iloa fo'i pe faape'i le galulue i se oganuu e ese le gagana e tautala ai. O lea, na ma siitia ai i se faapotopotoga faa-Peretania i Bergen, ma e tasi le tausaga sa ma iai i inā. Sa matou nonofo faatasi ma le tinā o Lisbeth." E le'i umi lava, ae filifili loa Knut ma Lisbeth e siitia atu i se isi atunuu. Na matuā telē se suiga, ina ua la filifilia le atunuu o Uganda. E ta'i lua masina i tausaga ta'itasi e la te toe fo'i ai i Norway e faigaluega ai, ina ia tausai ai o la'ua mana'oga, ma tala'i faataimi atoa ai pea i lenā atunuu.

## 'INĀ TOFOTOFO IA MA ILOA AI E LELEI IEOVA'

O ā ni i'uga ua maua e nei auauna a leova, na loto malilie e siitia atu i se vaipanoa o loo telē ai le mana'oga? Na ta'ua e Roald: "Ua sili atu ona tele le taimi e faifaimea faatasi ai lo matou aiga, nai lo o le tulaga sa iai i Bergen. Ua matuā māfana lo matou aiga. O se faamanuiaga le vaaia o le aga'iga'i i luma faaleagaga o la ma fanau. E lē gata i lea, e lē o toe faaaluina le

**O le faatatauina o mataupu silisili faale-Tusi Paia, e fesoasoani lea iā te oe e nofosauni ai e auauna i se vaipanoa o loo mana'omia ai le 'autala'i:**

- Tatalo atu iā leova ina ia faamalosia lou faanaunauga, ma foa'i mai le "atamai aogā."—Faata. 3: 21; Fili. 2:13; Iako. 1:5.

- la sa'ili atu mo fautuaga mai uso ta'umatuaina. "O lē e savali ma tagata atamamai, e atamai ai o ia."—Faata. 12:15; 13:20.
- la faia ni fuafuaga ma'oti. "O fuafuaga a le tagata to'aga e manuia ai o ia."—Faata. 21:5.

- la faia taumafaiga ina ia faatau-nuu ai na fuafuaga. 'la faia mea lelei.'—Sala. 37:3.

**E mautinoa o le a faamanuia e leova au taumafaiga, pe afai e te uia nei laasaga.—Faata. 16:3.**



"Ua matuā māfana lo matou aiga."—Roald

tele o lo matou taimi ma le malosi i le sa'ilia o mea-faitino, e pei o le taimi muamua."

Sa iloa e Elsebeth, sa tatau ona ia a'oa'oina se isi gagana fou. E aofia i le oganuu a le faapotopotoga i Lakselv le nuu o Karasjok. E nofoia lea vaipanoa e le to'atele o tagata Sami, lea e mai le itu i mātū o Nouē, Suetena, Finilani ma Rusia. O lea, ina ia faafaigofie ona talanoa atu Elsebeth i tagata Sami, sa ia a'oa'oina ai loa lea gagana. Na faapea mai ma le fiafia Elsebeth: "E ono su'esu'ega faale-Tusi Paia o loo o'u faia, ma ua ou matuā fiafia lava i la'u auaunaga."

Ua avea nei Fabian o se auauna o le faiva ma o se paeonia fo'i, i la latou faapotopotoga fou. Na ia ta'ua, e to'atolu ni talavou i le faapotopotoga na la fesoasoani ai ma Isabel. Sa la faalaeiauna i latou ina ia faatele so latou sao i mea fai a le faapotopotoga. Ua avea i latou o ni talavou maelega i le galuega tala'i i le taimi lenei. Ua papatiso le to'alua, ma na avea i la'ua o ni paeonia lagolago iā Mati 2012. Sa faafetaia e le isi talavou Fabian ma Isabel, ona o le la fesoasoani sa mafai ona toe faamalosia ai lona itu faaleagaga. Na faapea mai Fabian: "Na matuā pā'ia lava lo'u loto ona o lenā faamatalaga. O se fiafiaga le fe-

soasoani i isi tagata." Na ta'ua e Isabel: "Ua ou matuā fiafia lava i la'u auaunaga, ma ua ou talitonu i le moni o upu nei, 'ia tofotofo ma iloa e lelei leova.'" —Sala. 34:8.

Ua faatamaoaigaina Marelius ma Kesia i le itu faaleagaga, ona ua faafaigofie le auala e la te ola ai. Ua to'a 41 le 'autala'i i le faapotopotoga i Alta. Na faapea mai Marelius: "E tele ni suiga ua mafai ona faia i o ma olaga, pe a toe faatusatusa i le taimi ua te'a. E leai se isi olaga e sili atu ona faamalieina ai. O lea, e ma te faafetaia ai leova, ona ua mafai ona ma auauna o ni paeonia i lenei oganuu." Ua faapea mai Kesia: "Ua fesoasoani lea iā te a'u e faatuatua atoatoa ai iā leova. E na te le'i tuulafoa'iina lava i ma'ua. O le nofo vala-vala mai aiga, ua aogā lea iā te a'u e faa'aogā tatau ai le taimi pe a toe faatasi ma i latou. E leai se taimi e lagona ai le faanoanoa ona o la ma filifiliga."

Ae faapefea Knut ma Lisbeth? Na faapea mai Knut: "Na umi se taimi o tau faamasani i le si'omaga fou, faapea tū ma aga a lea atunuu. E tele taimi e ma te fesaga'ia ai faafitauli, e pei o le faalētonu o le suāvai, eletise, ma le tigā o le manava mai lea taimi i lea taimi. Peita'i, e lē avea na mea ma itu e faavaivaia ai i ma'ua mai le faia o a ma su'esu'ega faale-Tusi Paia." Ua faapea mai Lisbeth: "E iai oganuu e le'i oo ai lava le tala'iga, lea e lē mamao ese mai le mea e ma te nonofo ai. Peita'i, e mātuauna i taimi uma e tala'ia ai na vaipanoa, le fiafia o tagata e faitau le Tusi Paia. E latou te manana'o e a'oa'oina i latou i le Tusi Paia. E lē mafaatusalia le olioli e ma te mauaina mai i le a'oa'oina o nei tagata lotomaulalo."

E mautinoa le fiafia o lo tatou Ta'ita'i o Iesu Keriso, ona ua mafai ona oo atu le galuega sa ia amataina, i le tele o atunuu i le lalolagi. O se fiafiaga mo auauna uma a leova, le ofo atu o i latou lava e faataunuaina le poloa'iga a Iesu, ina ia "fai tagata o nuu uma lava ma soo."—Mata. 28:19, 20.



*‘Ia lototele ma faama-  
losi auā e faatasi  
Ieova lou Atua  
ma oe.’—IOSUA 1:9.*

---

#### O LE Ā LAU TALĪ?

---

O le ā na tatau ona faia e Iosua  
ina ia faaalai ai pea le faatuatua  
ma le lototele?

---

O ai faaa’oa’oga o le lototele e  
sili ona e fiafia i ai?

---

O ai faaa’oa’oga o le faatuatua  
ma le lototele e mafai ona feso-  
soani iā te oe i le galuega tala’i?

## IA LOTOTELE E FAATASI IEOVA MA OE

E UI e tatou te fesaga’ia faafitauli e pei o isi tagata, ae e tatou te maua le olioli i le auaunaga iā Ieova. E lē gata i lea, e tatou te mafatia fo’i ona o le faia o le mea sa’o. (1 Pete. 3:14; 5:8, 9; 1 Kori. 10:13) O lea, ina ia taulau i le fesaga’ia o faafitauli, e tatou te mana’omia le faatuatua ma le lototele.

<sup>2</sup> O le ā le faatuatua? Na tusi Paulo: “O le faatuatua, o le faatalitali lea ma le mautinoa i mea ua faamoemoe i ai, o le faamaoniga manino lea o mea moni e ui ina e lē o vaaia.” (Epe. 11:1) Na ta’ua e se tasi faaliliuga e faapea: “O le faatuatua o se pepa e faamaonia ai mea ua e faamoemoe i ai. O le faatuatua o le mautinoa lea i mea e tatou te lē o vaaia.” (*The Simple English Bible*) O se aiāiga tusinga, e mafai ona faamaonia ma e mautinoa ai o oe e ana se mea totino. O le faatuatua fo’i ua **mafai** ai ona tatou mautinoa ma talitonuina folafolaga a Ieova. E tatou te **mautinoa** e faataunuaina uma e le Atua ana folafolaga, e ui e lē o mafai ona tatou vaaia i le taimi lenei.

<sup>3</sup> O le lototele, o le mafai lea ona tatou tautatala ma gaoioi e aunoa ma le fefe, pe a oo i tulaga faigatā. E uiga atu fo’i i le maumaua’i, ma le lotomalilie e onosaia puapuaga ona o o tatou talitonuga.—Mare. 6:49, 50; 2 Timo. 1:7.

<sup>4</sup> E tatou te mana’omia uma le faatuatua ma le lototele. Peita’i, e iai taimi e tatou te manatu ai e mana’omia ona faamalositia atili lo tatou faatuatua ma le lototele. E anoanoa’i faaa’oa’oga lelei o auauna a Ieova o ē na faaalai le faatuatua ma le lototele. O lea, ina ia mafai ona faamalositia nei uiga iā i tatou, e tāua ona

---

1, 2. (i) O ā uiga e mafai ona fesoasoani iā i tatou i le fesaga’ia o faafitauli? (ii) O le ā le faatuatua? Ia faata’ita’i.

3, 4. (i) O le ā le lototele? (ii) O le ā se tasi o auala e mafai ona faamalositia ai lo tatou faatuatua ma le lototele?

tatou iloilo toto’a nei faaa’oa’oga mai le Tusi Paia.

### NA FAATASI IEOVA MA IOSUA

<sup>5</sup> Se’i o tatou toe mafaufau i se mea na tupu i le 3,500 tausaga ua mavae. O le taimi lea ua 40 tausaga talu ona faasa’olotoina e Ieova Isaraelu mai Aikupito, ma o loo avea Mose ma o latou ta’ita’i. E 120 tausaga o Mose ina ua ave o ia e Ieova i le tumutumu o le mauga o Nepo, ma matamata ai i le Nuū Folafoina. Na maliu ai lava Mose i le tumutumu o lea mauga, ona soloa’i ane lea o Iosua e avea ma ta’ita’i o le nuu, ma o ia o sē na ‘tumu i le agaga e atamai ai.’ (Teu. 34: 1-9) O le taimi lea ua nofosauni Isaraelu e nofoia laueleele o Kanana. O lea, ina ia mafai ona avea Iosua ma ta’ita’i lelei, na mana’omia ona iā te ia le atamai mai le Atua, faatuatua, mautinoa, ma le lototele.—Teu. 31:22, 23.

<sup>6</sup> O le atamai, lototele ma le faatuatua na faaalua e Iosua, na faamalosi ai Isaraelu a o latou tau mo le tele o tausaga e faoa laueleele o Kanana. Na latou mana’omia le lototele e tauina ai taua ma usiusita’i ai i le Atua. O lea, ina ua lata ina maliu Iosua, na ia faapea atu ai iā i latou: “Ia outou matuā lototetele e tausi ma faia mea uma ua tusia i le tusi o le tulafono a Mose, ia lē liliuese mai ai i le itu taumatau po o le itu tauagavale.” (Iosua 23:6) E tatou te mana’omia le lototele e usiusita’i ai iā Ieova i taimi uma, aemaise pe a uuna’ia i tatou e isi e faia ni gaoioiga e feteena’i ma lona finagalo. (*Faitau le Galuega 4:18-20; 5:29.*) O le a tatou maua le lototele, pe a tatalo i le ta’ita’iga a Ieova ma mau faatuatua o ia.

5. O le ā na mana’omia e Iosua ina ia taulau manuia ai i lona tofiga?

6. (i) E tusa ai ma le Iosua 23:6, o le ā le māfuaaga e tatou te mana’omia ai le lototele? (ii) O le ā e tatou te a’oa’oina mai le Galuega 4:18-20 ma le Galuega 5:29?

### E FAAPEFEA ONA TATOU TAULAU MANUIA?

<sup>7</sup> Ina ia maua le lototele e faia ai le finagalo o le Atua, e tatou ona tatou su’esu’eina le Tusi Paia ma faatatau i o tatou olaga. O le mea lenā na faailoa atu iā Iosua e tatou ona ia faia ina ua avea ma ta’ita’i: “Ia e lototele ma matuā faamalosi e faia e tusa ma mea uma o i le tulafono na poloa’i atu ai la’u auauna o Mose iā te oe. . . . Aua ne’i

---

Mau o le tausaga e 2013:  
‘Ia lototele ma faamalosi  
auā e faatasi Ieova lou  
Atua ma oe.’  
—Iosua 1:9

---

te’a ese lenei tusi o le tulafono mai i lou gutu, ae ia e faitau lē leoa i ai i le ao ma le pō, ina ia e faia e tusa ma mea uma ua tusia ai; ona manuia ai lea o ou ala, ma e gaoioi ai ma le poto.” (Iosua 1:7, 8) Na mulimuli Iosua i lenā fautuaga, ma ‘manuia ai ona ala.’ O le mulimuli i lenā faaa’oa’oga, o le a tatou maua ai fo’i le lototele ma taulau manuia ai i le auaunaga iā Ieova.

<sup>8</sup> Na toe fetalai atili atu Ieova iā Iosua e faapea: “Ia lototele ma faamalosi. Aua le fefe pe mata’u, auā e faatasi Ieova lou Atua ma oe i mea uma e te alu i ai.” (Iosua 1:9) O loo faatasi Ieova ma i tatou. O lea, po o ā lava tofotofoga e tatou te fesaga’ia, e lē tatou ona tatou atuatuva ai. Ae e sili ona faalaeiauina i tatou i upu nei: ‘Ia lototele

7. O le ā na tatou ona faia e Iosua ina ia taulau manuia ai ma maua le lototele?

8. O le ā le mau o le tausaga e 2013, ma e faapefea ona fesoasoani na upu iā te oe?



ma faamalosi auā e faatasi Ieova lou Atua ma oe.' O upu na o loo faamauina i le Iosua 1:9, ua filifilia e avea ma mau o le tausaga e 2013. O na upu faapea faaa'oa'oga a isi na faaalua le faatuatua ma le lototele, o le a faamalosia ai i tatou a o faagasolo lenei tausaga.

### NA LATOU LOTOTETELE E FAI LE FINAGALO O IEOVA

<sup>9</sup> Ina ua auina atu e Iosua ni sipai se to'alua i Kanana, na faalafiina i la'ua e Raava le fafine talitane, ae faasino atu o la fili i le ala sesē. O le faatuatua ma le lototele na ia faaalua, na faasaoina ai o ia ma lona aiga ina ua faaumatiaina e Isaraelu le aai o Ieriko. (Epe. 11:30, 31; Iako. 2:25) Na lafoa'ia e Raava lona olaga lē mamā na iai ina ia faafiafiaina ai Ieova. O lea, e mafai fo'i e i latou ua avea ma Kerisiano ona faaalua le faatuatua ma le lototele, ma suia o latou olaga ina ia faafiafiaina ai Ieova.

<sup>10</sup> Na soifua Ruta le fafine Moapi ina ua mavae atu Iosua. Sa ia a'oa'oina e faataua iā Ieova ona sa ia faaipoipo atu i se tane Isaraelu. O lea, na ia lototele ai e auauna iā Ieova. Na nofo Naomi, le tinā o lona to'alua i Moapi, ma o i inā na maliliu ai lana tane faapea lana fanau tama e to'alua. O le mātuaaga lea na filifili ai Naomi e toe fo'i i Isaraelu. Na faapea atu Naomi iā Ruta ina ia toe fo'i i lona nuu. Peita'i na faapea mai Ruta: 'Aua e te finau mai iā te a'u ina ia ou tuulafoa'i iā te oe, ia ou lē mulimuli atu iā te oe. O lou nuu e fai ma o'u nuu, ma o lou Atua, o lo'u Atua fo'i lea.' (Ruta 1:16) Na mulimuli ane faaipoipo Ruta iā Poasa, se tasi o tauaiga o Naomi. Na fanau sa la tama, ma na tupuga mai ai Tavita ma Iesu. E manino mai ai, e faamanuia e Ieova

**9.** Na faapefea ona faaalua e Raava le faatuatua ma le lototele?

**10.** Na faapefea ona faamaonia e Ruta lona nauau e auauna iā Ieova, ma o le ā le i'uga na oo i ai?

i latou e faaalua le faatuatua ma le lototele. —Ruta 2:12; 4:17-22; Mata. 1:1-6.

### NA LAMATIA O LATOU OLA

<sup>11</sup> E faamalosia lo tatou faatuatua ma le lototele, pe a mātuaina le fesoasoani a Ieova iā i latou o loo faamuamua le faia o lona finagalo, faapea le puipuiina o o latou uso. O se faata'ita'iga, se'i mafaufau i le Ositaulaga Sili o Ioiata ma lana avā o Iosape. Ina ua mavae le maliu o le tupu o Aasaia, ona fasiotia lea e lona tinā o Atalia o fanau a le tupu, se'i vaganā ai Ioasa, ae avea ai o ia ma tupu tama'ita'i. Peita'i, na tausia faananā e Ioiata ma Iosape, Ioasa le atalii o Aasaia mo le ono tausaga, e ui na lamatia ai o la'ua ola. Na faatonuina e Ioiata le avea o Ioasa ma tupu, ae faatonuina le fasiotia o Atalia i le tausaga lona fitu. (2 Tu. 11:1-16) Na fesoasoani Ioiata i le tupu o Ioasa i le toe faaleleia o le malumu. Na maliu Ioiata ina ua 130 ona tausaga, ma na tanu faatasi o ia ma tupu, "auā na ia faia mea lelei i Isaraelu ma le Atua moni ma Lona fale." (2 No. 24:15, 16) O le gaoioi ma le lototele o Ioiata ma lana avā, na faasaoina ai le gafa tautupu mai iā Tavita se'ia oo i le Mesia.

<sup>12</sup> Na lamatia le ola o Epetemeleka, o se tasi o auauna i le maota o le tupu o Setekaia, i le puipuiina o Ieremia. Na tuua'ia e perenise o Iuta Ieremia o sē e fouvale. O lea, na faatagaina ai i latou e le tupu o Setekaia e faia so o se gaoioiga latou te manana'o ai iā Ieremia. O le i'uga, na lafoina o ia i se vaieli palapalā, ma tuu ai se'ia oti. (Iere. 38:4-6) Na talosaga atu Epetemeleka i le tupu ina ia fesoasoani iā Ieremia. Na lamatia ai lona ola, ona sa feita tagata iā Ieremia. Peita'i na malie i ai

**11.** Na faapefea ona faaalua e Ioiata ma Iosape le lototele, ma o le ā na i'u iai?

**12.** O le ā le gaoioiga lototele na faia e Epetemeleka?


le tupu ma faatonuina Epetemeleka, e ave ni tamāloloa se to’a 30 e aumaia i fafo Ieremia mai le lua. O lea, na folafola ai e Ieova iā Ieremia le faasaoina o Epetemeleka, pe a osofa’ia e Papelonía Ierusalema. (Iere. 39: 15-18) E tauia e Ieova i latou e lototetele e faia lona finagalo.

<sup>13</sup> I le 600 tausaga a o le’i afio mai le Mesia, na faamaonia ai e ni auauna Eperu se to’atolu a Ieova, e tauia i latou e faaalía le faatuatua ma le lototele. Na poloa’ia e Nepukanesa tagata aloa’ia uma o Papelonía ina ia tapua’i i se tupua auro. O i latou e lē usiusita’i i lenā faatonuga e lafoina i se ogaumu aasa. Peita’i, na faapea atu ma le faaaloalo nei talavou iā Nepukanesa: “E mafai e lo matou Atua o loo matou auauna i ai ona lavea’i iā i matou. Le tupu e, e na te lavea’i i matou mai i le ogaumu aasa ma lou lima fo’i. Ae afai e leai, le tupu e, ia e silafia e matou te lē auauna i ou atua ma e matou te lē tapua’i fo’i i le tupua auro ua e faatūina.” (Tani. 3:16-18) I le Tanielu 3:19-30, o loo faamatala manino ai le lavea’iina e Ieova o nei Eperu e to’atolu. Atonu e lē faamata’uina i tatou i le susunuina i se afi, ae e iai taimi e tofotofoina ai lo tatou usiusita’i i tulaga faigatā. Peita’i, e mautinoa e faamanuia e Ieova i tatou pe a faaalía le faatuatua ma le lototele.

<sup>14</sup> Na faaalía e Tanielu le faatuatua ma le lototele, ina ua taumafai ona fili e faia se tulafono e aafia ai o ia. Na latou fai atu i le tupu o Tariu: “O so o se tasi e faatoga atu i se atua po o se tagata i le tolu sefulu aso, se’i vaganā ai oe le tupu e, ia lafoina o ia i le lua o leona.” Ina ua iloa e Tanielu lenei tulafono, “ona ulu atu lea o ia i lona fale, ua

**13.** (i) Na faapefea ona faaalía e Eperu e to’atolu le lototetele? (ii) O le ā e tatou te a’oa’oina mai i lea tala?

**14.** E tusa ma le Tanielu mataupu e 6, na faapefea ona gaoioi ma le lototele Tanielu, ma o le ā le i’uga na oo i ai?



Na teena e ulua’i Kerisiano le tapua’i i le emeperoa o Roma

tatala faamalama e faasaga i Ierusalema i le potu pito i luga o lona fale, ma e faatolu i le aso ona ia tootuli e tatalo ma avatu viiga i lona Atua, e pei ona ia masani ai.” (Tani. 6:6-10) Na lafoina Tanielu i le lua o leona, peita’i na faasaoina o ia e Ieova.—Tani. 6: 16-23.

<sup>15</sup> Na lamatia ola o Akula ma Pisila ona o Paulo. (Galu. 18:2; Roma 16:3, 4) Na la faaalía le lototele ma faia le faatonuga lenei a Iesu: “Ua ou tuuina atu iā te outou le poloa’iga fou, ina ia outou alolofa o le tasi i le isi; e pei ona ou alofa atu iā te outou, ia ou-

**15.** (i) Na faapefea ona faaalía e Akula ma Pisila le faatuatua ma le lototele? (ii) O le ā le uiga o le fetalaiga a Iesu o loo i le Ioane 13:34, ma ua faaalía faapefea e Kerisiano lea alofa?

tou alolofa fo'i o le tasi i le isi." (Ioa. 13:34) I le Tulafono a Mose, na mana'omia ai i se tasi ona ia alofa atu i isi e pei ona ia alofa iā te ia lava. (Levi. 19:18) Peita'i, aiseā ua avea ai lenei faatonuga a Iesu o se poloa'iga "fou"? Ona o lo tatou faaalua o le alofa, e tatou ai ona tatou lotomalilie e foa'i o tatou ola mo isi, e pei ona sa faia e Iesu. E to'a-tele Kerisiano moni i aso nei ua lamatia o latou ola, ina ia puipuia ai o latou uso mai i lima o o latou fili.—**Faitau le 1 Ioane 3:16.**

<sup>16</sup> Na faata'ita'i Kerisiano i le ulua'i senituri iā Iesu, i le tapua'i lea e tau lava o Ieova. (Mata. 4:8-10) Na latou mumusu e tapua'i i le emeperoa o Roma. (Taga'i i le ata.) Na ta'ua i le tusi *Those About to Die*, e faapea: "E to'aitiiti lava nai Kerisiano na faaamamulu, e ui ina tū ai pea se fata faitaulaga o loo mumū ai le afi i le malae e latou te faaagāina. Na pau lava le mea e faia e se pagota, o le faasalalauina lea o ni nai mea manogi i luga o le afi, ona avatu loa lea i ai o lona Tusi Pasi Faafaitaulaga ma faasa'olotoina ai. Sa faamatala atu fo'i ma le faaeteete iā te ia e faapea, e lē o tapua'i i le emeperoa; ae ua na ona ia aloa'ia lava o le uiga tauatua o le emeperoa e fai ma ta'ita'i o le malo o Roma. Peita'i, e to'aitiiti lava ni Kerisiano na lolo atu."

<sup>17</sup> E tele avanoa na tuuina atu i Kerisiano na iai i nofoaga o faasalaga a le 'au Nasi ina ia 'alofia ai le fasiotia o i latou. E pau le gaioiga e latou te faia o le sainia lea o se maliaga, e faailoa atu ai e lē toe avea i latou o ni Molimau a Ieova, ma e to'aitiiti lava nisi na lolo atu. A o faia le taua i Rwanda, na lotomalilie uso Tutsi ma Hutu, e lamatia o latou ola ina ia puipuia ai o latou uso. I tulaga faapena, e mana'omia ai e auauna a Ieova le lototele ma le faatuatua.

**16, 17.** (i) Na faapefea ona tofotofoina le faatuatua o nisi o Kerisiano i le ulua'i senituri? (ii) Ua faapefea ona tofotofoina le faatuatua o nisi o Kerisiano i aso nei?

## O LOO FAATASI IEOVA MA I TATOU

<sup>18</sup> Ua tatou maua le avanoa matagofie e tala'ia ai le Malo ma faia isi ma soo. O le galuega lenei e sili ona tāua ua tuuina mai e Ieova i ana auauna. (Mata. 24:14; 28:19, 20) E mata'ina le faata'ita'iga na faataatia e Iesu. O loo ta'ua i le Luka 8:1, 'na ia malaga atu mai i lea aai i lea aai, ma mai i lea nuu i lea nuu, ua tala'i ma folafola atu le tala lelei o le malo o le Atua.' E pei o Iesu, e tatou te mana'omia le lototele ma le faatuatua ina ia tala'ia ai le tala lelei o le Malo. O le fesoasoani a Ieova, o le a tatou maua ai fo'i le lototele e pei o Noa. Na avea o ia o 'sē e tala'i le amiotonu' i se "lalolagi o tagata faalēmata'u," lea na faaumatiaina i le Lolo.—2 Pete. 2:4, 5.

<sup>19</sup> E fesoasoani le tatalo iā i tatou i le galuega tala'i. Ina ua sauāina soo o Iesu, na latou tatalo ina ia faaauau ona latou 'ta'uta'u atu ma le lototetele le afioga paia a le Atua,' ma na faafogaina a latou tatalo. (**Faitau le Galuega 4:29-31.**) Pe a lagona le fefe i le tala'iga, ia tatalo iā Ieova mo le faatuatua ma le lototele, ma e mautinoa o le a ia fesoasoani mai.—**Faitau le Salamo 66:19, 20.\***

<sup>20</sup> E lē faigofie le taumafai e faia le finagalo o Ieova i lenei lalolagi amioleaga. Peita'i, o loo faatasi Ieova ma i tatou, ma o loo fesoasoani mai fo'i lona Alo, le Ulu o le faapotopotoga. E lē gata i lea, o loo tatou faatasi ma le silia i le 7,000,000 isi Molimau a Ieova i le lalolagi aoao. O lea, se'i faaauau ona tatou faaalua le faatuatua ma tala'ia le tala lelei. O le a fesoasoani le mau o le 2013 iā i tatou e faia ai faapea: 'Ia lototele ma faamalosi auā e faatasi Ieova lou Atua ma oe.' —Iosua 1:9.

\* Taga'i i isi faaa'oa'oga o le lototele i le mataupu "Ia E Lototele ma Matua Faamalosi," i *Le Olomatamata* o Fepuari 15, 2012.

**18, 19.** O ā faaa'oa'oga faale-Tusi Paia o le lototele ma le faatuatua, e fesoasoani iā i tatou i le tala'iga?  
**20.** O le ā le fesoasoani ua maua e auauna a Ieova?



# IA LEAI SE MEA E VAVAESEA OE MAI IĀ IEOVA

*“Inā outou filifili ia  
i le aso nei po o ai e  
tou te auauna i ai.”*

—IOSUA 24:15.

---

## IA TALI FESILI NEI

---

E faapefea ona e faamautinoa e  
lē mafai e lau galuega ona va-  
vaeesea ai oe mai iā Ieova?

---

E faapefea ona filifili lelei au faa-  
fiafiaga?

---

O le ā e fesoasoani iā te oe, pe a  
tuuā e se tasi o lou aiga Ieova?

E TĀUA tele filifiliga e tatou te faia, auā e aafia ai o tatou olaga. E pei lava o se tagata o loo savali i se auala ma tau atu i ni magāala se lua, ma filifili po o lē fea le ala e ui ai. E tatau ona ia filifilia le ala e vave ona ia taunuu ai i le nofoaga o loo ia fia malaga i ai.

<sup>2</sup> Ua ta’ua i le Tusi Paia le to’atele o i latou na tatau ona faia ni filifiliga tāua i o latou olaga. O se faa-ta’ita’iga, sa tatau ona filifili Kaino e pulea lona ita pe leai. (Kene. 4:6, 7) Sa filifili fo’i Iosua pe e tapu-a’i i le Atua moni po o atua sesē. (Iosua 24:15) Sa naunau Iosua e mafuta vavalalata atu iā Ieova. O lea, na ia filifilia ai le ala e mafai ona fesoasoani iā te ia e faia ai faapea. Peita’i, na faia e Kaino se filifiliga na tuueseā ai o ia mai iā Ieova.

<sup>3</sup> E iai taimi e tatau ona tatou faia ai se filifiliga tāua ina ia tumau ai i le ala sa’o. E tatau ona manatua, o a tatou filifiliga e mafai ona vavalalata atu ai iā Ieova ma faamamaluina ai o ia, pe e faaeesea ai fo’i i tatou mai iā te ia. (**Faitau le Eperu 3:12.**) O le a tatou iloiloaina i le mataupu lenē, ma le mataupu o le a sosoo mai vala e fitu o le olaga, e mafai ona tatou faia ai ni filifiliga e ono faaeesea ai i tatou mai iā Ieova.

## O SINI MA GALUEGA

<sup>4</sup> E tatau i Kerisiano ona galulue e tausia i latou lava ma o latou aiga. Ua faailoa mai e le Tusi Paia, afai e lē mana’o se tasi e tausia lona aiga, e sili atu lona leaga nai lo o le tagata e lē faatuatua. (2 Tesa. 3:10; 1 Timo. 5:8) E tāua galuega, peita’i a tatou lē faaeteete, e mafai e a tatou filifiliga i galuega ona va-

---

**1-3.** (i) Aiseā e aveā ai Iosua ma faaa’oa’oga lelei? (ii) O le ā e tatau ona tatou manatua pe a faia ni filifiliga?

**4.** Aiseā e tāua ai galuega?



vaeeseina i tatou mai iā Ieova. E faapefea?

<sup>5</sup> Pe afai o sa'ilia sau galuega, atonu e tofotofoina oe e talia **so o se** galuega e ofoina mai, pe afai e faigatā ona maua ni galuega i lou atunuu. Ae faapefea pe afai e iai ni mataupu silisili o le Tusi Paia e feteena'i ma lenā galuega? Pe a mana'omia ona faaaogā le tele o lou taimi i le galuega, pe faamata o le a iti-iti ai lou taimi mo le faapotopotoga ma lou aiga? Pe e tatau ona e talia le galuega, ona e te mafaufau e sili atu lenā nai lo o le leai o se galuega? Ia manatua, o lau filifiliga e mafai ona e vavalalata pe vavaeesea ai oe mai iā Ieova. (Epe. 2:1) E faapefea ona e faia se filifiliga atamai, pe a e mafaufau e sui pe e sa'ili sau galuega?

<sup>6</sup> E faalagolago lau filifiliga e fai, i le mea e te mana'o e fai i lou olaga. Ia fesili ifo iā te oe lava, 'O le ā le māfuaaga ou te mana'omia ai se galuega?' Afai o lou faanaunauga ina ia mafai ai ona tausia lou aiga, ma faaaui ai pea i le auau-naga, e mautinoa o le a fesoasoani mai Ieova. (Mata. 6:33) E silafia e Ieova le auala e fesoasoani ai iā te oe, pe a faapea ua leai sau galuega ma lē a'ua'u lau faasoa. (Isa. 59:1) "E moni lava e silafia e Ieova le auala e lavea'i ai tagata e faamaoni iā te ia mai i o latou puapuaga." —2 Pete. 2:9.

<sup>7</sup> Ae faapefea pe afai e te faigaluega ona o lou naunau e fia mau'oa? E mafai ona e taulau, peita'i, o le faigaluega ona o le faanaunauga e fia mau'oa, e mafai ona lamatia ai. (**Faitau le 1 Timoteo 6:9, 10.**) O le a e vavaeesea oe mai iā

---

5. O le ā e tatau ona e mafaufau i ai a o le'i taliaina se galuega?

6, 7. (i) O ā māfuaaga e talia ai e se tasi se galuega? (ii) E faapefea i le galuega e te filifilia ona vavaeesea oe mai iā Ieova, ma aiseā?

Ieova, pe afai e sili ona tāua tupe ma galuega i lou olaga.

<sup>8</sup> Afai o oe o se matua, ia manatua e mafai ona aafia lau fanau i au filifiliga. O le ā lo latou manatu i le mea e sili ona tāua i lou olaga? Pe e sili ona tāua iā te oe lau galuega, po o lau faauōga ma Ieova? Pe afai e sili ona tāua iā te oe le fia ta'uta'ua ma le sa'ilia o le tele o tupe, pe e te manatu o le a latou faia fo'i se filifiliga sesē faapena a o latou tuputupu a'e? Atonu o le a latou lē faaaloalo fo'i i lou tulaga o se matua. Na faapea mai se talavou Kerisiano: "Sa matou manatu i le taimi muamua, na galue mamafa lo'u tamā ina ia lelei le tausiga o le aiga. Peita'i, a o faagasolo taimi, na iai se mea na suia. Na ia faigaluega i le tele o taimi ina ia faatau ai mea taugatā e lē mana'omia. O le i'uga, na iloa i matou o se aiga e tele tupe, nai lo o le avea ma ē e faalaeiauina isi e auuna iā Ieova. E sili atu ona tāua iā te a'u le galue mamafa o lo'u tamā e tausia i matou i le itu faaleagaga, nai lo o le sa'ilia o le tele o le tupe."

<sup>9</sup> Mātua, aua ne'i vavaeesea outou mai iā Ieova, ona o le faamuamua o galuega. Ia iloa e lau fanau, e sili atu ona tāua iā te oe mea faaleagaga nai lo o le sa'ilia o meafaitino.—Mata. 5:3.

<sup>10</sup> Talavou, e faapefea ona e faia se filifiliga atamai pe afai o loo e mafaufau i sau galuega i le lumana'i? E pei ona tatou a'oa'oina, e faalagolago lau filifiliga i le mea e te mana'o e fai i lou olaga. Atonu e te mafaufau e auai i se a'oga e faalatele ai lou tomai i se galuega. Pe faamata e fesoasoani lenā galuega iā te

---

8, 9. O ā fesili e tatau ona fesili ifo ai mātua e faatatau i a latou galuega? Faamatala.

10. O le ā e tatau ona mafaufau i ai se talavou pe a filifilia se galuega?

oe ina ia avea ai lau auaunaga iā Ieova o se mea e sili ona tāua i lou olaga? Pe o lau galuega o le a vavaeesea ai oe mai iā Ieova? (2 Timo. 4:10) Pe e pei oe o tagata o le lalolagi, e faato’ā maua lava le fiafia pe a tele tupe? Ia tatou faatuatua-ina Ieova e pei o Tavita, o lē na tusi: “Sa ou talavou, a o lenei ua ou toeaina, ae ou te le’i iloa lava se tagata amiotonu ua tuulafoa’iina, po o ana fanau o ‘aisi mo ni mea’ai.” (Sala. 37:25) Ia manatua, o le tasi ala e mafai ona vavaeesea ai oe mai iā Ieova, a o le isi ala e mafai ona e maua ai se olaga faamalieina. (**Faitau le Faa-taoto 10:22; Malaki 3:10.**) O le ā le ala o le a e filifilia?\*

### TAFAOGA MA FAAFIAFIAGA

<sup>11</sup> E lē o faapea mai le Tusi Paia e le-aga ma leai se aogā o faafiafiaga. Na tusi atu Paulo iā Timoteo, e iai aogā o le faa-malositino. (1 Timo. 4:8) Ua faapea mai le Tusi Paia e iai le “taimi e ‘ata’ata ai,”

\* Mo nisi faamatalaga, taga’i i le mataupu e 38 o le tusi *Questions Young People Ask—Answers That Work*, Volume 2, ma *Le Olomatamata* 2007, Me 1, itulau e 27, 28.

**11.** O le ā le manatu o le Tusi Paia i faafiafiaga, peita’i o le ā e tatau ona tatou manatua?

ma le “taimi e osooso ai,” ma ua faala-eiauina i tatou ina ia lava le mālōlō. (Fai. 3:4; 4:6) Peita’i a tatou lē faaeteete, e mafai e faafiafiaga ona vavaeesea i ta-tou mai iā Ieova. E faapefea? E ala i **itu-aiga** o faafiafiaga e tatou te filifilia, faa-pea le **tele o le taimi** e tatou te faaalu ai.

<sup>12</sup> Muamua, se’i o tatou mafaufau i ituaiga o faafiafiaga e tatou te filifilia. E iai faafiafiaga lelei, peita’i, ua si’omia i tatou i faafiafiaga e inosia e le Atua, lea e aofia ai faiga sauā, faiga faagaga ma amioga lē mamā. O lea, ia filifili lelei a tatou faafiafiaga. Ia mafaufau i fesili nei: O le ā se aafiaga o a’u faafiafiaga iā te a’u? Pe e faaauilumaina ai faiga sauā ma le uiga lotonuu? Pe e uuna’ia ai fo’i a’u ina ia iai le uiga faumālō? (Faata. 3: 31) Po o le a ou faaaluina ai le tele o tupe? Pe o le a tausuai ai isi pe a la-tou iloa ituaiga faafiafiaga o loo o’u fili-filia? (Roma 14:21) O ai ituaiga tagata o le a matou faifaimea faatasi i nei itu-aiga faafiafiaga? (Faata. 13:20) Pe e uu-na’ia a’u e nei faafiafiaga e faia amioga lē talafeagai?—Iako. 1:14, 15.

**12.** O le ā e tatau ona e mafaufau i ai pe a fili-filia au faafiafiaga?

E aogā faafiafiaga pe a filifili lelei ma talafeagai le taimi e faaaluina ai



<sup>13</sup> Ia mafaufau fo'i i le tele o le taimi e faaaluina i au faafiafiaga. Ia fesili ifo iā te oe lava: Po o o'u faaaluina le tele o le taimi i faafiafiaga, ma itiiti ai le taimi mo le tala'iga ma sauniga? O le soona faaalu o le taimi i evaevaga, o le a lē maua ai le fiafia e tatau ona maua mai i faafiafiaga. Peita'i, e sili atu le fiafia e maua e i latou e fuafua lelei le taimi e faaaluina i faafiafiaga. Aiseā? E lē faapopoleina i latou, talu ai sa latou faamuamua mea e sili ona tāua.—*Faitau le Filipi 1:10, 11.*

<sup>14</sup> E foliga mai e ono maua le fiafia i le tele o le taimi e faaalu i faafiafiaga, peita'i e mafai ona vavaeesea ai i tatou mai iā Ieova. Na faamatala e se talavou e 20 tausaga e igoa iā Kim, e masani ona ia faifaimea faatasi ma isi i faai'uga o vaiaso. Peita'i, i le taimi lenei ua ia iloa e iai mea e sili atu ona tāua. I le avea ai ma paeonia, e tatau ona usu i le 6 i le taeao i le tala'iga. O lea, e lē tatau ona ia toe eva umi i le pō. Na ia faapea mai: "Ua ou iloa e lē leaga faafiafiaga, peita'i, e mafai ona taa'ina ese ai a'u." Na iloa e Kim, e tatau ona fuafua lelei le taimi e faaalu i tafaoga ma faafiafiaga.

<sup>15</sup> O le tiute tauave o mātua le saunia o le tausiga faaletino, faaleagaga, faapea le itu tau faalogona o fanau. E aofia ai i nei mea le saunia o faafiafiaga mo i latou. E ui e iai faafiafiaga e lē lelei, peita'i, e lē tatau ona manatu mātua e leaga faafiafiaga uma. (1 Kori. 5:6) Pe a la iloilo ina lelei faafiafiaga, o le a mafai ona maua ai auala e fiafia ai le aiga.\* O

---

\* Mo nisi faamatalaga, taga'i i *Le Olomatamata* o Mati 1 2006, itulau e 19, palakalafa e 9-13.

**13, 14.** Aiseā e tatau ai ona e mafaufau i le tele o le taimi e faaalu i faafiafiaga?

**15.** E faapefea ona fesoasoani mātua i a latou fanau ina ia filifilia lelei faafiafiaga?

le faia faapea, o le a lē mafai ai e faafiafiaga ona vavaeesea lou aiga mai iā Ieova.

### FAIĀ FAALEAIGA

<sup>16</sup> O se mea masani le malosia o le alofa i le va o mātua ma fanau. Na faata'ita'ia fo'i e Ieova lona alofa i ona tagata, i le alofa o se tinā i lana tama. (Isa. 49:15) E masani ona tatou faanoanoa pe a tuua e se tasi o le aiga Ieova. Na faapea mai se tasi o tuafafine na faate'aina sana tama teine: "Sa ou lagona le lē fiafia, ma taumānatu, 'Aiseā ua ia tuua ai Ieova?' Na oo iā te a'u faalogona nofosala, ma tuua'ia a'u e tusa o le mea na tupu."

<sup>17</sup> Afai o lou tulaga lenā, e silafia lelei e Ieova ou faalogona. Na 'tigā fo'i lona finagalo' ina ua fouvale le ulua'i tagata, faapea i latou na ola faatasi ma Noa. (Kene. 6:5, 6) E lē malamalama i latou e le'i faate'aina se tasi o lona aiga i le tigā o lea tulaga. Peita'i, e mata'utia le faatagaina o amioga sesē a o tatou tauaiga ua faate'aina, e vavaeesea i tatou mai iā Ieova. O le ā le auala e fesaga'ia ai na tulaga faanoanoa?

<sup>18</sup> Aua le tuua'ia oe mo le mea na tupu. E tauave e le sui ua papatiso o le aiga lana lava ia avega, ma filifili pe auauna iā Ieova pe leai. (Kala. 6:5) I le silafaga a Ieova, e lē tuua'ia oe i le mea na tupu, peita'i o le tagata faimea sesē. (Eseki. 18:20) E lē tatau ona tuua'ia isi, peita'i, ia faaaloogia le auala ua tauaao ai e Ieova le mataupu. E lē tatau fo'i ona tatou tuua'ia toeaina, ona o i latou o loo leoleoina le lafu. Peita'i, ia tatou

---

**16, 17.** (i) O ā tulaga faigatā ua fesaga'ia e le to'atele o mātua i aso nei? (ii) E faapefea ona tatou iloa e malamalama lelei Ieova i o tatou faalogona?

**18.** Aiseā e lē tatau ai i mātua ona tuua'ia i latou pe a tuua e le fanau Ieova?



E lē afāina le faamoemoe e toe fo'i mai iā leova sē e pele iā te oe

tetee atu i le Tiapolo, ma lē vavaeesea ai i tatou mai iā leova.—1 Pete. 5:8, 9.

<sup>19</sup> O le ā e tupu pe a e lē fiafia iā leova ona o le faate'aina o lau tama? E mafai e lenā mea ona vavaeesea ai oe mai iā leova. E ui e pele iā te oe lē ua faate'aina, ae ia iloa e lenā tagata, e sili atu lou alofa iā leova nai lo o lou aiga. Ina ia fesaga'ia lea tulaga faigatā, e tatau ona e taumafai e faamallosia lau faiā ma leova. E lē gata i lea, ia faaauau pea ona faifaimea faatasi ma uso ma tuafāfine. (Faata. 18:1) Ia faailoa atu ou faalogona iā leova i le tatalo. (Sala. 62:7, 8) Ia 'alofia le faia o ni faamolemolega ina ia faifaimea faatasi ai pea ma lē ua faate'aina. O se faata'ita'iga, e ala i le fesoota'i i le telefoni po o le imeli. (1 Kori. 5:11) Ia pisi pea i le auau-

**19, 20.** (i) O le ā e fesoasoani i mātua pe a faate'aina se tasi o le fanau? (ii) O le ā le faamoemoe e tatau ona iai i mātua?

naga iā leova. (1 Kori. 15:58) Na faapea mai le tuafafine lea na ta'ua i le amata: "Ua ou iloa e tatau ona ou pisi pea i le auaua iā leova, ina ia faamallosia ai pea lo'u itu faaleagaga. O le faia faapea, e mafai ai ona ou toe fesoasoani i la'u tama pe a toe fo'i mai iā leova."

<sup>20</sup> Ua faapea mai le Tusi Paia o le alofa "e faamoemoe i mea uma." (1 Kori. 13:4, 7) E lē afāina le faamoemoe e toe fo'i mai iā leova sē e pele iā te oe. E to'atele i latou na faate'aina e filifili e toe fo'i mai iā leova ma lana faalapotopotoga i tausaga ta'itasi. E lē tumau ai pea le lē fiafia o le finagalo o leova, pe a faaalua e le tagata faimea sesē le salamō. Nai lo o lea, ua ia 'nofosauni e faamagaloina' i latou.—Sala. 86:5.

## IA FAIA FILIFILIGA ATAMAI

<sup>21</sup> Ua tuuina mai e leova le aiā e tatou te faia ai filifiliga i le olaga. (**Faitau le Teuteronomie 30:19, 20.**) Peita'i e tatau ona tatou faia ni filifiliga atamai. Ia fesili ifo le tagata lava ia: 'Po o o'u faia ni filifiliga lelei i le olaga? Po o o'u faatagaina a'u faafiafiaga, galuega, ma faiā faaleaiga e vavaeesea ai a'u mai iā leova?'

<sup>22</sup> E lē mavae le alofa o leova mo ona tagata. O lea, e leai se mea e mafai ona vavaeesea ai i tatou mai iā te ia, se'i vaganā ua tatou faia ni filifiliga sesē. E lē tatau ona tupu lenā mea. (Roma 8: 38, 39) Ia tatou faamautinoa e leai se mea e mafai ona vavaeesea ai i tatou mai iā leova. O le a talanoaina i le mataupu i le vaiaso fou, isi vala e fā o le olaga e mana'omia ona tatou faia ai ni filifiliga atamai.

**21, 22.** O ā ituaiga o filifiliga o le a e faia i le olaga?





# IA MAFUTA VAVALALATA ATU PEA IĀ IEOVA

*“Ia outou mafuta vavalalata atu i le Atua, ona mafuta vavalalata mai lea o ia iā te outou.”—IAKO. 4:8.*

---

## PE E MAFAI ONA E FAAMATALA?

---

E faapefea ona tatou faamauti-  
noa e lē mafai e masini  
faaonapōnei ma le soifua mālō-  
lōina, ona vavaeeseina i tatou  
mai iā Ieova?

---

E faapefea ona tatou ‘alofia le  
mana’o tele i tupe ma le uiga  
faamaualuga?

---

E faapefea ona tatou mafuta va-  
valalata atu iā Ieova?

NA FOAFOAINA e Ieova le tagata ma le fuafuaga ia  
iai se faiā lelei ma ia. Peita’i, e mana’o Satani e tatou  
te mafaufau e lē mana’omia ona iai sa tatou faiā ma  
Ieova. Sa amata ona taumafai Satani e faatalitonu ta-  
gata i lenā manatu, ina ua ia faasesēina Eva. (Kene. 3:  
4-6) Talu mai lenā taimi, e to’atele ua latou mafaufau  
e latou te lē mana’omia le Atua.

<sup>2</sup> E lē tatau ona faasesēina i tatou e Satani, auā ua  
faapea mai le Tusi Paia, e “tatou te lē vālea i ana toga-  
fiti.” (2 Kori. 2:11) E faaosoosoina e Satani i tatou ina  
ia faia filifiliga e vavaeeseina ai i tatou mai iā Ieova.  
Na tatou iloiloina i le mataupu ua mavae le auala e faia  
ai filifiliga e faatatau i galuega, faafiafiaga, ma mata-  
upu i le aiga. Peita’i, o le a iloiloina i le mataupu lenei  
le auala e faaosoosoina ai i tatou e Satani e ala mai  
i masini faaonapōnei, soifua mālōlōina, tupe, ma le  
uiga mimita. E mafai ona tatou “mafuta vavalalata” atu  
iā Ieova, pe a lelei ona faia a tatou filifiliga i nei vala o  
le olaga.—Iako. 4:8.

## MASINI FAAONAPŌNEI

<sup>3</sup> Ua faaaogā e le to’atele o tagata komepiuta ma le  
tele o isi masini faaonapōnei. E aogā nei masini pe  
afai e faaaogā tatau. Ae e mafai ona vavaeeseina ai i  
tatou mai iā Ieova, pe a faaaogāsesēina. E aogā ko-  
mepepiuta. Ua faaaogā e uso e tusia ma lolomia ai le  
*Olomatamata*. Ua mafai fo’i ona faia ai sa’ili’iliga, fe-  
soota’iga, ma taaloga. Peita’i e mafai ona alu uma ai  
lo tatou taimi ma mafaufau. E masani ona uuna’ia e

---

1, 2. (i) Ua faapefea ona taumafai Satani e faasesēina tagata?  
(ii) O le ā e fesoasoani iā i tatou ina ia mafuta vavalalata atu ai iā  
Ieova?

3. Faamatala itu e mafai ona aogā ma lamatia ai le faaaogāina o  
masini faaonapōnei.

faasalalauga faapisinisi tagata, ina ia **tatau** lava ona latou faatauina masini fou. Na faapea mai se talavou, o lona naunau tele i se tasi o masini fou, na faatau ai se tasi o ona fatuga’o ina ia mafai ai ona faatauina lenā masini.

4 E sili atu ona leaga pe afai e aafia la tatou faiā ma leova ona o masini faaonapōnei. E mafai ona alu uma ai le taimi, pe faaaogāina sesē fo’i. Na faapea mai Ioane, na ia faaalu le tele o lona taimi i le komepiuta nai lo o le faia o su’esu’ega.\* E masani ona tuai ona moe pe a ia faaaogāina le Initaneti i le pō. E ui i lona lē lavā, ae na atili faigatā ai iā te ia ona taofi le faaaogāina o le komepiuta, e oo lava i le matamata i ata lē lelei. Na ia taumafai e tuu lana masaniga. O lea, na ia faapolokalameina ai lana komepiuta, ina ia pē i le taimi e tatau ona moe ai.—*Faitau le Efeso 5:15, 16.*

\* Ua suia nisi igoa.

4. Na faapefea ona tuu e se tasi o uso lana masaniga o le soona faaaogā o le komepiuta?

Mātua, ia fesoasoani i le fanau e faaaogā tatau masini faaonapōnei



5 E lē mana’omia ona pulea e mātua gaioiga uma a le fanau. Peita’i, e tatau ona latou pulea le faaaogāina e fanau o le komepiuta. E lē tatau ona faaaogāina e tamaiti tuatusi e faatatau i faiga faataulāitu ma faiga lē mamā, taaalo i taaloga sauā, pe faifaimea fo’i ma tagata leaga i le initaneti. Afai e tuufau i latou, atonu o le a latou mafufau e leai se afāina o na mea. O le tiute o mātua le puipuia o fanau ma talavou mai le vavaeese mai iā leova. E oo lava i meaola e latou te puipuia a latou toloa’i. O lea, e alagatatau ai i mātua ona puipuia a latou fanau mai i tulaga e lamatia ai.—Faatusatusa i le Hosea 13:8.

6 Ia fesoasoani i lau fanau ina ia aumea atu i Kerisiano ta’umatuaina i le faapopotoga. Ae ia manatua, e mana’omia ona faaalu **lou** taimi ma lau fanau, e ala i le taliē, taaalo ma galulue faatasi. O le faia faapea, o le a outou mafuta vavalalata atu ai iā leova.\*

## SOIFUA MĀLŌLŌINA

7 Na amata ona mama’i tagata talu mai le taimi na usita’i ai Atamu ma Eva iā Satani, ma vavaeeseina ai i la’ua mai iā leova. E fafia Satani pe a tatou mama’i, ona o le a faafaigatā ai la tatou auunaga. Ae pe a tatou feoti, o le a lē mafai ona tatou toe auuna iā leova. (Sala. 115:17) O le faalogona masani lava le naunau ia ola mālōlōina.<sup>#</sup> Peita’i, e tatau fo’i ona tatou manatu mamafa i le soifua mālōlōina o o tatou uso ma tuafāfine.

\* Taga’i i le mataupu, “Le Auala e Tausia A’e ai Fanau e Maufaatutuaina” i le *Ala Mai!* o Ianuari-Mati 2012.

<sup>#</sup> Taga’i i le mataupu “Auala e Lima e Maua ai le Soifua Mālōlōina Lelei,” i le *Ala Mai!* o Iulai-Setema 2011.

5, 6. (i) O le ā e tatau ona faia e mātua mo fanau? (ii) E faapefea ona faamautinoa e mātua o loo lelei aumea a le fanau?

7. Aiseā e tatou te manana’o ai e soifua mālōlōina?

<sup>8</sup> E tāua lo tatou soifua mālōlōina, peita'i, e lē tatau ona avea ma o tatou popolega autū. Ua faaalu e nisi le tele o le taimi e talanoa ai i mea'ai paleni, faapea vailaau ma togafitiga faafoma'i, nai lo o le tala'ia o le Malo. E latou te manatu o loo latou fesoasoani i isi. Peita'i, e lē tatau ona faaaogā Maota mo Sauniga, fonotaga ma tauaofitiga, e faatau ma faailoa atu ai a tatou togafitiga faafoma'i. Aiseā?

<sup>9</sup> E tatou te auai i sauniga ina ia a'oa'oina ai mea faaleagaga, ma maua ai le olioli, se tasi o vala o le fua o le agaga paia. (Kala. 5:22) E le'i fuafuaina a tatou sauniga ina ia talanoa ai i togafitiga faafoma'i, auā o le a aveesea ai le olioli o isi. (Roma 14:17) E tatou ona fai e le tagata lava ia ana filifiliga e faatatau i lona soifua mālōlōina. E oo lava i foma'i, e lē mafai ona latou aumaia vaifofō o faama'i uma. O le soona popole i o tatou ola, e lē mafai ona faafualoaina ai o tatou aso. (Luka 12:25) Peita'i, "o le loto e fialia e aogā auā e mālōlō ai."—Faata. 17:22.

<sup>10</sup> E tatau ona tatou manatu mamafa i o tatou foliga vaaia. Peita'i, e lē tatau ona tatou soona naunau e toe maua foliga a o talavou. Ua faapea mai le Tusi Paia: "O le ulusinā o le pale matagofie lea pe a iai i le ala o le amiotonu." (Faata. 16:31) E sili atu ona tāua i le silafaga a Ieova le tagata lilo i totonu, ma o le auala fo'i lenā e tatau ona tatou mafaufau ai. (*Faitau le 1 Peteru 3: 3, 4*) E lē tatau ona lamatia o tatou ola i le faia lea o ni togafitiga ma ni taotoga lave-lave, ina ia aulelei atili ai. Po o le ā lava lo tatou matutua ma lo tatou soifua mālōlō-

---

8, 9. (i) E faapefea ona 'alofia le avea o le soifua mālōlōina ma o tatou popolega autū? (ii) O ā aogā o le mauaina o le olioli?

10. (i) O le ā e sili ona tāua i le silafaga a Ieova? (ii) O afea o le a tatou maua ai le soifua mālōlōina atoatoa?

ina, ae "o le olioli mai iā Ieova," e maua ai le fialia moni. (Nee. 8:10) E na o le lalolagi fou o le a maua ai le soifua mālōlōina atoatoa, ma toe fo'i ai i le tulaga talavou. (Iopu 33:25; Isa. 33:24) O lea, ia faia filifiliga atamai i le taimi lenei, ma faatuatuaina folafolaga a Ieova. O le faia faapea, o le a maua ai le olioli i le taimi lenei, ma lē avea ai le mauaina o le soifua mālōlōina ma o tatou popolega autū.—1 Timo. 4:8

### TUPE

<sup>11</sup> E lē leaga le mauaina ma le sa'ilia o tupe. (Fai. 7:12; Luka 19:12, 13) Peita'i, o le "**mana'o tele** i tupe," o le a vavaeeseina ai i tatou mai iā Ieova. (1 Timo. 6:9, 10) O le "popole i mea a lenei lalolagi," e mafai ona faavaivaia ai i tatou i le itu faaleagaga. O le 'malosi taufaasesē fo'i o le 'oa,' e mafai ona faasesēina ai i tatou i le manatu e faapea, e mafai e 'oa ona aumaia le puipuiga ma le fialia tumau. (Mata. 13:22) Peita'i, na faapea mai ma le manino Iesu, "**e lē mafai ona pologa se tasi**" i le Atua atoa ma 'oa.—Mata. 6:24.

<sup>12</sup> E mafai ona faaosoosoina i tatou e faia mea sesē, pe a mafaufau o tupe o le mea lea e sili ona tāua i le olaga. (Faata. 28:20) Ua faatauina e nisi pepa *lotto*, ona ua tosina i folafolaga o le mauagofie o 'oa. Ua faia e nisi uso faiga faapisinisi e nonō atu ni tupe i ni pasene e sili ona tetelē, po o pisinisi e faatogafiti ona maua mai ai tupe a isi tagata. Ua latou taumafai e faalaeiau tagata o le faapotopotoga e teu a latou tupe i a latou pisinisi faapena. Ua seetia isi i folafolaga e lē faavaea e faapea e tele tupe e toe maua mai. Ia faautauta, ma aua e te seetia pe aafia i faiga matape'ape'a ma faatogafalea.

---

11. E faapefea ona avea tupe ma mailei?

12. O ā auala e taumafai tagata e vave ona maua ai tupe, ma e faapefea ona tatou 'alofia?

<sup>13</sup> O le a faamanuia e Ieova i tatou pe a tatou faamuamua le “malo ma le amiotonu.” (Mata. 6:33; Efe. 4:28) E lē finagalo Ieova e tatou te tautulemomoe pe a auai i le sauniga, ona o le faaalu o le tele o le taimi i galuega, pe popole fo’i i tupe a o iai i le Maota mo Sauniga. O le to’atele o tagata e popole i le sa’ilia o tupe, ma e tau-mafai malosi e faamautū o latou lumana’i i le itu faaletino. E latou te uuna’ia fo’i a latou fanau ina ia faia faapea. Peita’i, na faaalia e Iesu le leai o se aogā o le faia faapea. (**Faitau le Luka 12:15-21.**) E tatou te manatua ai Kiasi, o lē na mafaufau e mafai ona ia mau’oa ma iai pea sana faiā lelei ma Ieova.—2 Tu. 5:20-27.

<sup>14</sup> E ono magoto ifo se aeto pe a tau-mafai e pu’ea se i’a telē. E mafai fo’i ona tupu se mea faapena iā i tatou, pe a tatou taumafai e fia mau’oa. Na faamatala e se toeaina e igoa iā Aleki, e masani ona fuafua lelei le faaaogāina o ana tupe. O se faata’ita’iga, e oo lava i se *shampoo* e na te lē faama’imauina. Peita’i, na ia mafaufau e amata sana pisinisi ina ia mafai ona ia faamavae ai i lana galuega, ae fai lana paeonia. E lē gata na ia faaaogāina ana teugātupe, ae na ia nonōina fo’i se vaegātupe ina ia mafai ona faagaoioi ai lana pisinisi, ma maua ai se polofiti telē. Peita’i, na gau le pisinisi ma lē toe maua ai le tele o ana tupe. Na ia faapea mai, “na ou naunau e toe maua mai a’u tupe.” Peita’i, na ia mafaufau, a onosa’i, atonu o le a toe maua ana tupe, pe a toe sologa lelei le tulaga o mea.

<sup>15</sup> Na alu le mafaufau o Aleki i ana tupe. Na faigatā ona ia faamuamua le auaunaga iā Ieova, ma lē moe lelei ai. Peita’i, e le’i toe

sologa lelei le tulaga o mea. Na alu uma ai ana tupe, ma na i’u lava ina faatau lona fale. Na ia ta’ua, “na ou faapogaia faafitauli i lo’u aiga.” Peita’i, na ia a’oa’oina mai ai se lesona tāua. Na ia faapea mai: “E faanoanoa i’uga e oo iā i latou e tuu atu lo latou faatuatuga i le faiga o mea a Satani.” (Faata. 11:28) Pe a tuu atu lo tatou faatuatuga i tupe po o auala e sa’ilia ai tupe, e faailoa mai ai o loo tatou faatuatuaaina Satani, le “atua o lenei faiga o mea a le lalolagi.” (2 Kori. 4:4; 1 Timo. 6:17) Ua faafai-gofie le olaga o Aleki, ma ua toe faaalu le tele o lona taimi i le tala’iga. Ua toe fiafia lona aiga, ma mafuta vavalalata atu iā Ieova.—**Faitau le Mareko 10:29, 30.**

### FAAMAUALUGA

<sup>16</sup> E tataua ona tatou mitamita i le avea o i tatou ma Molimau a Ieova. (Iere. 9:24) O le māfuaaga lenā e tatou te faia ai filifiliga atamai, ma taumafai e ola i tapulaa mauauluga a Ieova. Peita’i, e lē tataua ona tatou faamaualuga ma manatu e sili atu lo tatou iloa nai lo o Ieova. O le faia faapea, e vavaeeseina ai i tatou mai iā te ia.—Sala. 138:6; Roma 12:3.

<sup>17</sup> Ua ta’ua i le Tusi Paia faaa’oa’oga o i latou na faaalia le faamaualuga faapea le lotomaulalo. Na faamanuia e Ieova Tavita ina ua ia talosaga atu ma le lotomaulalo mo le ta’ita’iga. (Sala. 131:1-3) Peita’i, na faasalaina e le Atua le tupu o Nepukanesa ma Pelesara ona o le faamaualuga. (Tani. 4:30-37; 5:22-30) E iai taimi e tofotofoina ai lo tatou lotomaulalo. O se faaa’oa’oga, na siitia atu se auauna o le faiva e 32 tausaga e

**16.** (i) O le ā e tataua ona tatou mitamita ai? (ii) O le ā e tupu pe a tatou mafaufau ua sili atu lo tatou iloa nai lo o Ieova?

**17, 18.** (i) Aumai ni faaa’oa’oga i le Tusi Paia o ē na faaalia le faamaualuga ma le lotomaulalo. (ii) Na faapefea ona lē faatagaina e se tasi uso le faamaualuga e vavaeeseina ai o ia mai iā Ieova?

**13.** O le ā le eseesega o le silafaga a Ieova i tupe ma le manatu o le lalolagi?

**14, 15.** Aiseā e lē tataua ai ona tatou mafaufau e mafai e tupe ona aumaia le puipuga? Aumai se faata’ita’iga.



igoa iā Ryan, i se faapotopotoga fou. Na ia mafaufau e lē o toe umi ae avea o ia ma toeaina. Peita’i, ina ua mavae le tausaga, e le’i avea lava o ia ma toeaina. Pe na lē fiefia ai Ryan i toeaina ona o lenā mea? Pe na tofia ai lona auai i sauniga, ma faataga le faamaualuga e vavaeeseina o ia mai iā Ieova ma le faapotopotoga? O le ā e te faia pe ana faapea e oo se tulaga faapena iā te oe?

<sup>18</sup> Na faia sa’ili’iliga a Ryan i le auala e atia’e ai le uiga faatalitali. (Faata. 13:12) Na ia faapea mai, “na mana’omia ona ou atia’e le onosa’i ma le lotomaulalo, ma na mana’omia ona ou faataga Ieova e toleniina a’u.” Na amata ona ua’i o ia e fesoasoani i isi i le faapotopotoga, faapea i latou e feiloa’i ai i le tala’iga. E le’i umi ae tele ana su’esu’ega faale-Tusi Paia. Na ia faapea mai: “Na faate’ia a’u ina ua tofia a’u e avea ma toeaina i le tasi ma le ‘afa tausaga mulimuli ane. O lo’u fiefia tele i la’u faiva na ou lē toe popole ai i le avea o a’u ma toeaina.” —*Faitau le Salamo 37:3, 4.*

### IA MAFUTA VAVALALATA ATU IĀ IEOVA

<sup>19</sup> E tāua uma i o tatou olaga vala e fitu na talanoaina i nei mataupu e lua. Ia mitamita i le avea o i tatou ma auauna a Ieova. E mafai ona tatou maua le olioli i le olaga faaleaiga faapea le soifua mālōlōina. E aogā fo’i a tatou galuega ma tupe, auā e mafai ona tausia ai i tatou ma o tatou aiga. E aogā faafiafiaga, ma e fesoasoani fo’i masini faaonapōnei iā i tatou. Ae ia manatua, o le faaalū sesē o le taimi ma le faaogā sesē o na mea, e mafai ona vavaeeseina ai i tatou mai iā Ieova.

<sup>20</sup> E naunau Satani e vavaeeseina i tatou mai iā Ieova. Peita’i, e tatau ona tatou tau-

**19, 20.** (i) E faapefea ona faamautinoa e tatou te lē faatagaina se tasi o vala na talanoaina e vavaeeseina i tatou mai iā Ieova? (ii) O ā ni faaa’oa’oga o ē na mafuta vavalalata atu iā Ieova?

mafaī malosi e puipuia i tatou ma o tatou aiga. (Faata. 22:3) E tele faaa’oa’oga o i latou na mafuta vavalalata atu iā Ieova. O se faata’ita’iga, na “savavali” Enoka ma Noa ma le Atua moni. O lea, ia tatou mafuta va-

## Ia aua ne’i faatagaina se mea e vavaeeseina ai i tatou mai iā Ieova

vavalalata atu pea iā Ieova. (Kene. 5:22; 6:9) Sa ‘tūmausalī pea Mose e pei ua ia iloa atu Lē e lē o vaaia.’ (Epe. 11:27) Na faamanuia e Ieova Iesu ona sa ia naunau e faia lona finagalo. (Ioa. 8:29) Ia tatou mulimuli i na faaa’oa’oga. “Ia olioli pea. Ia tatalo e lē au-noa. Ia faafetai i mea uma lava.” (1 Tesa. 5:16-18) O lea, ia aua ne’i faatagaina se mea e vavaeeseina ai i tatou mai iā Ieova.

Ia olioli i lau faiva, nai lo o le naunau i faaeaga





# AUAUNA E AUNOA MA FAALOGONA NOFOSALA

*“O le faagalo lea o mea  
ua tuana’i, ae tepa  
taula’i atu i mea o i  
le lumana’i.”—FILII. 3:13.*

---

## MĀTAU MAI MANATU AUTŪ NEI:

---

O le ā na fesoasoani iā Paulo e  
‘alofia ai le popole i mea sesē na  
ia faia i le taimi ua te’a?

---

O le ā le faamatalaga a le Tusi  
Paia i le auala e maua ai le to’a-  
filemu o le mafau-fau?

---

O le ā e tatau ona tatou faia ina  
ia ‘alofia ai faalogona nofosala i  
le auaunaga iā leova?

NA TUSI se tusitala e suafa iā J. G. Whittier, e faa-  
tatau i mea e oo ai iā i tatou faalogona nofosala. E  
salamō nisi i mea na latou faia i le taimi ua te’a.  
Peita’i, o nisi e tumau pea ona faanoanoa, ona o  
mea na latou lē taulau ai. Pe e iai se taimi e oo ai  
iā te oe na faalogona?

<sup>2</sup> Na faia e nisi ni mea sesē po o ni agasala ma-  
tuiā i le taimi ua tuana’i. Ae e lē mautonu isi pe na  
latou faia ni filifiliga atamai i o latou olaga. E lē o  
toe mafau-fau isi i o latou olaga i le taimi ua te’a.  
Peita’i, e faaaauau pea ona iai faalogona nofosala i  
isi ma mafau-fau: ‘Ma’imau e pe ana ou lē faia lea  
mea.’ (Sala. 51:3) Pe e faapena ou faalogona? Pe e  
mafai ona e auauna iā leova e aunoa ma le mafau-  
fau pea i mea sesē na e faia i le taimi ua tuana’i?  
O le a fesoasoani le faaa’oa’oga a le aposetolo o  
Paulo iā i tatou ina ia faia ai faapea.

<sup>3</sup> E lē gata na faia e Paulo mea sesē matuiā i lona  
olaga, ae sa ia faia fo’i ni filifiliga atamai. Na oo iā  
te ia faalogona nofosala ona o ana mea sesē. Pei-  
ta’i, na ia taumafai e ua’i atu e faia le mea sili i lana  
aunaga. O lea, se’i o tatou iloilo ina lana faaa’o-  
a’oga.

## OLAGA TUAI O PAULO

<sup>4</sup> A o avea Paulo ma Faresaio, na ia faia ai ni ga-  
oioiga na mulimuli ane toe salamō ai. O se faa-  
ta’ita’iga, na ia matuā sauāina soo o Keriso. Ua  
faapea mai le Tusi Paia ina ua mavae le fasio-

---

1-3. (i) O ā faalogona o nisi e faatatau i mea na latou lē tau-  
lau ai i le taimi ua te’a? (ii) O le ā se aafiaga iā te oe o mea  
sesē na e faia i le taimi ua te’a? (iii) O le ā e tatou te a’oa’o-  
ina mai iā Paulo?

4. O ā mea na faia e Paulo na toe salamō ai?

tia o Setefano, ona 'soona sauā lea o Saulo i le faapotopotoga, ua osofa'i atu i lea fale ma lea fale, ma fetoso mai tane ma fafine, ua ia tuuina atu i latou i le falepuipui.' (Galu. 8:3) Ua faamatala mai e se faitofā e suafa iā Barnes e faapea, o le upu Eleni iinei ua faaliliuina i le "soona sauā" o se faaupuga malosi, e faaalialia ai le maelega ma le lotoa o Saulo i le taimi lea na ia faia ai sauāga. Sa matuā ita Saulo i le ekalesia "e pei o se manu fe'ai." O le maelega o Saulo i le lotu Iutaia, na ia talitonu ai na finagalo le Atua e tafiese le faapotopotoga Kerisiano. O le māfuaaga lea na ia 'faamata'u atu pea ma matuā naunau e fasiotia i latou uma o tane ma fafine.'—Galu. 9:1, 2; 22:4.\*

<sup>5</sup> Na malaga mulimuli ane Saulo i Tamaseko ina ia aveesea Kerisiano mai i o latou aiga, ma avatu i Ierusalem ina ia faasalaina i le faamasinoga maua luga a Iutaia. Peita'i, na taofia o ia e Iesu, le Ulu o le faapotopotoga Kerisiano. (Efe. 5:23) Na faaali mai Iesu iā Saulo a o ia malaga atu i Tamaseko, ma faatauasoina ai o ia i se malamalama mai le lagi. Na auina atu e Iesu o ia i Tamaseko e faatali ai mo isi faatonuga, ma ua tatou iloa le mea na tupu ai.—Galu. 9:3-22.

<sup>6</sup> Ina ua iloa e Paulo e sesē lana mea na fai, ona ia lē toe sauāina lea o Kerisiano ae amata loa ona ia tala'ia ma le

---

\* E tele ina ta'ua i le Tusi Paia na aofia ai fo'i ma fafine iā i latou na sauāina e Saulo. E faaalialia mai ai, na iai se vaega tāua a fafine i le tala'ia o le tala lelei i le ulua'i senituri, e pei fo'i o aso nei.—Sala. 68:11.

5. Faamatala le auala na suia ai Saulo mai sē sauāina Kerisiano, ae avea ma se tasi e tala'i e faatautau iā Keriso.

6, 7. E faapefea ona iloa na amana'ia e Paulo ana mea sesē na fai?


maelega le tala lelei e faatautau iā Keriso. E ui i lea, e le'i faapea na lē amana'ia ai e Paulo mea sesē na ia faia. Na ia tusi e faatautau iā te ia lava e faapea: "O le mea moni, na outou faalogu muamua i la'u amio a o ou iai i le lotu Iutaia, sa ou matuā sauā pea i le faapotopotoga a le Atua ma faataugā i ai." (Kala. 1:13) Na ia toe ta'ua fo'i lenā mea ina ua ia tusi atu iā Timoteo, faapea faapotopotoga i Korinito ma Filipi. (**Faitau le 1 Korinito 15:9;** 1 Timo. 1:13; Fili. 3:6) Na māsiasi Paulo i mea na tutupu. E ui i lea, e le'i faapea ai na sologa lelei mea uma iā te ia, auā na ia iloa le matuā o mea sesē na ia faia.—Galu. 26:9-11.

<sup>7</sup> Na tusi se faitofā o le Tusi Paia e suafa iā Frederic W. Farrar, i le vaega-fai a Paulo i "sauāga sili ona matagā" na faia i Kerisiano. E mafai ona tatou malamalama ai i le ootia o faalogona o Paulo, faapea faitioga na ono faia e tagata e faatautau iā te ia. Ina ua asiasi atu Paulo i le tele o faapotopotoga, atonu na faapea ane nisi, 'o oe lea o Paulo na sauāina i matou.'—Galu. 9:21.

<sup>8</sup> Na iloa e Paulo, pe ana lē faaalialia e le Atua le agalelei faifua iā te ia, e lē mafai ona avea o ia ma aposetolo. E sili ma le 90 taimi na talanoaina ai le agalelei faifua o le Atua, i ana tusi e 14. (**Faitau le 1 Korinito 15:10.**) Na talisapaia e Paulo le agalelei na faaalialia atu e le Atua iā te ia. O le māfuaaga lea na sili ai lona galue mamafa i le auaunaga i le Atua, nai lo o isi aposetolo. O le ā e tatou te a'oa'oina mai le faaa'oa'oga a Paulo? E nofosauni Ieova e faamagaloina i tatou, pe a tatou

---

8. (i) O ā faalogona o Paulo i le agalelei faifua na faaalialia e le Atua iā te ia? (ii) O le ā e tatou te a'oa'oina mai le faaa'oa'oga a Paulo?



Na auauna Paulo e aunoa ma faalogona nofosala

faatuatua i le taulaga a Iesu, faailoa atu a tatou mea sesē, ma ‘alofia le faia pea o na mea sesē. O lea, ia manatua le faa-a’oa’oga a Paulo, pe a tatou mafaufau e lē mafai ona faamagaloina a tatou agasala. (**Faitau le 1 Timoteo 1:15, 16.**) E ui ina sauaina e Paulo soo o Iesu, ae na ia tusi: ‘O le Alo o le Atua, na alofa mai iā te **a’u** ma foa’iina mai lona ola mo **a’u.**’ (Kala. 2:20; Galu. 9:5) Na a’oa’oina e Paulo, e tatau ona ia faia le mea sili i le auaunaga iā Ieova, ina ia tuuititia ai ona faalogona nofosala. Pe e lē o se faa’a’oa’oga lelei ea lea mo i tatou?

### PE E OO IĀ TE OE FAALOGONA NOFOSALA?

<sup>9</sup> Pe na e faia se gaoioiga ua e toe lagona ai le salamō i le taimi lenei? Pe e

9, 10. (i) Aiseā e oo ai iā i tatou lagona nofosala? (ii) Aiseā e lē tatau ai ona tatou popole pea i mea sesē na tatou faia i le taimi ua tualā’i?

te mafaufau e le’i faaaluina lou taimi ma lou malosi e faia ai mea e sili ona tāua i le taimi ua te’a? Pe na e faia se gaoioiga e faatigā ai i isi? Po o le ā lava le māfuaaga, e tāua tele le fesili ifo: O le ā e tatau ona ou faia pe a oo faalogona faapena iā te a’u?

<sup>10</sup> E faapopoleina tagata i le mafau-fau pea i mea sesē na latou faia i le taimi ua mavae. Pe e mafai e le popole ona fo’ia se faafitauli? E leai. Se’i faapea o loo e faaaogaina se upega ma-saesae i sau faiva. E alu uma ai lou malosi, ae lē maua mai ai ni i’a. I se tulaga talitutusa, e lē tatau ona tatou popole, ae ia faia taumafaiga e fo’ia le faafitauli. Ia faatoese atu i lē na e faatigā i ai, ma taumafai e maua le nofo lelei. Ia faia au taumafaiga ina ia aua ne’i e toe faia lenā mea sesē i se taimi o i luma. Atonu i nisi taimi, e sili atu le taumafai e fesaga’ia āuga o a tatou mea sesē. Peita’i, o le soona popole, o le a



## O LE Ā LE ITU NA FAANOANOA AI IEOVA?

E tele taimi i le Tusi Paia e ta'ua ai na "faanoanoa" leova. (Kene. 6:6, 7; Faama. 2:18; 1 Samu. 15:11; Iona 3:10) E lē uiga ai faapea na faia e leova se gaoioiga sesē, auā e lelei atoatoa mea e

na te faia. (Nu. 23:19; Teu. 32:4) Peita'i e iai taimi e suia ai le finagalo o leova, pe a suia le tulaga o mea. O se faata'ita'iga, na filifili leova e faaumatia tagata i le taimi ua te'a ona o a latou ami-

oga leaga. Peita'i, na ia faaalua le agalelei ma faamagaloina i latou, ina ua latou salamō, suia o latou ala ma faia le mea tonu.—Iere. 18:7-10.

faigatā ai ona e faia le mea sili i le au-aunaga.

<sup>11</sup> E manatu nisi tagata e lē talafeagai ona latou mauaina le agalelei faifua o le Atua, pe a mafaufau i a latou mea sesē na fai. Peita'i, e mafai lava ona faailoa atu a latou agasala, fai suiga i o latou olaga, ma tatalo mo le faamagaloga, e tusa po o ā a latou mea sesē sa faia i le taimi ua te'a. (Galu. 3:19) E faaalua e leova le alofa ma le agalelei iā i latou, e pei ona ia faia i isi tagata. E na te faamagaloina i latou e faaalua le lotomaulalo, faamaoni, ma salamō mai a latou agasala. O se faata'ita'iga, na faamagaloina e leova lopu ina ua ia salamō mai ana mea sesē. (Iopu 42:6) Ua faapea mai le Tusi Paia: "O lē ua ufiufi i ana solitulafono e lē taulau manuia o ia, a o lē e ta'utino atu ma lafoa'i ia mea, o le a faaalua i ai le alofa mutimutivale." O le auala lenā e aveesea ai faalogona nofosala, ma maua ai le filemu o le mafaufau. (Faata. 28:13; Iako. 5:14-16) E mana'omia ona faailoa atu a tatou agasala i le Atua, tatalo mo lana faamagaloga, ma faaalua le salamō moni.

**11.** (i) O le ā e tatau ona tatou faia ina ia faaalua mai ai le alofa ma le agalelei o leova? (ii) E faapefea ona aveesea o tatou faalogona nofosala ona o mea sesē na faia i le taimi ua te'a?

(2 Kori. 7:10, 11) O le faia faapea, e faaalua mai ai le agalelei o leova iā i tatou. —Isa. 55:7.

<sup>12</sup> O le tatalo o se tasi o auala sili e fesoasoani mai ai leova. I se tasi o salamo, na faaalua ai e Tavita lona faatuatua e taliina e leova ana tatalo. (**Faitau le Salamo 32:1-5.**) A o le'i faailoa atu e Tavita ana agasala, na oia lona lotofuatiaifo. Na ia lagona le popole, ma'i ma lofitūina i faalogona nofosala. Na faamagaloina Tavita, ma to'afilemu lona mafaufau ina ua faailoa atu ana agasala iā leova. Na talia e leova lana tatalo, faaleleia ona faalogona, ma fesoasoani iā te ia ina ia faia pea le mea sa'o. Pe a tatou nofosala fo'i ona o a tatou mea sesē, ia tatalo atu mo le faamagaloga a leova, ma taumafai e suia o tatou ala. Ia tatou mautinoa e faafofoga mai leova i a tatou tatalo ma faamagaloina i tatou.—Sala. 86:5.

### IA TEPA TAULA'I I LE LUMANA'I

<sup>13</sup> E tatou te a'oa'oina ni lesona mai mea ua tutupu. Peita'i, e lē tatau ona

**12.** (i) E faapefea ona tatou faaa'oa'o iā Tavita pe a oia o tatou lotofuatiaifo? (ii) Aiseā ua faapea mai ai le Tusi Paia na "faanoanoa" leova, ma e faapefea ona fesoasoani lenā manatu iā i tatou? (Taga'i i le pusa.)

**13, 14.** (i) O le ā e tatau ona tatou taula'i i ai? (ii) O ā fesili e tatau ona tatou mafaufau ai i le taimi lenei?

tatou soona popole i ai. Ia taula'i e lē gata o le taimi lenei, ae faapea fo'i le lumana'i. Ia fesili ifo iā te oe lava: 'Po o o'u faamaoni i le auaunaga iā Ieova i le taimi lenei, ma lē faia ai se gaoioiga ou te toe salamō ai i le lumana'i? Po o le a ou toe salamō mulimuli ane ona o a'u filifiliga o loo faia i le taimi lenei?'

<sup>14</sup> Ua lalata mai le puapuaga tele. O lea, ia mafaufau i fesili nei: 'Pe e mafai ona ou faia ni mea e sili atu i le auau-naga i le Atua? Pe e mafai ona ou pae-onia? O le ā o loo taofiofia a'u mai le avefa ma auauna o le faiva? Po o o'u faia ni taumafaiga ina ia suia o'u uiga? Po o a'u o sē e finagalo Ieova e ola i le lalolagi fou?' Nai lo o le tau ina popole i mea e le'i tutupu, ia ua'i atu i mea o loo e faia i le taimi lenei, ma faamautinoa e te faia le mea sili i le auaunaga iā Ieova. Ia faia filifiliga e te lē toe salamō ai i le lumana'i.—2 Timo. 2:15.

### IA LĒ SALAMŌ I LE AUAUNAGA IĀ IEOVA

<sup>15</sup> Pe na e faia ni faataulaga ina ia auai ai i le auaunaga faataimi atoa? Atonu na e tuua se olaga taulau manuia, ina ia mafai ona e faia mea sili i le auaunaga iā Ieova. Pe atonu fo'i na e filifili e te lē faaipoipo, pe e lē faia ni fanau ina ia mafai ona auauna ai i Peteli, auai i galuega faufale i le lalolagi aoao, auauna o se ovasia femalagaa'i, po o se misionare. Pe o le a e toe salamō i na filifiliga a o faasolo ina avefa oe ma tagata matua? Po o le a e mafaufau fo'i e sesē le taimi na e faia ai na filifiliga, ma e leai sona tāua? E mautinoa e leai.

**15, 16.** (i) O ā faataulaga na faia e isi ina ia faamuamua ai le auaunaga iā Ieova? (ii) Aiseā e lē tatau ai ona tatou salamō ona o faataulaga na tatou faia?

<sup>16</sup> O lou alofa iā Ieova na e faia ai na filifiliga, faatasi ai ma lou naunau e fesoasoani i isi e auauna iā te ia. E lē tatau ona e mafaufau o le a sili atu lou manuia, pe ana e filifilia se isi itu-aiga o olaga. Nai lo o lea, ia e fiafia i filifiliga na e faia. Na e filifilia le au-ala sili e auauna ai iā Ieova, ma o le a ia lē faagaloia na faataulaga. I le ola moni i le lumana'i, o le a faamanuia oe e Ieova i faamanuiaga e te le'i mafaufauina.—Sala. 145:16; 1 Timo. 6:19.

### AUAUNA IĀ IEOVA E AUNOA MA FAALOGONA NOFOSALA

<sup>17</sup> O le ā na faia e Paulo ina ia 'alofia ai faalogona nofosala? Na ia ta'ua, e le'i faaauau ona ia popole i mea ua tuana'i, peita'i na ia galue punou-a'i mo lona tau i le lumana'i. (*Faitau le Filipi 3:13, 14.*) E le'i mafaufau pea Paulo i mea sesē na ia faia a o auai i le lotu Iutaia. Nai lo o lea, na ia faa-aogā lona malosia atoa e tumau faamaoni ai, ina ia maua ai lona tau i le ola e faa-vavau.

<sup>18</sup> O le ā e tatou te a'oa'oina mai iā Paulo? E lē tatau ona tatou popole i mea ua tuana'i, auā e lē mafai ona tatou suia. Nai lo o lea, ia tatou taula'i i mea e mafai ona faia i le taimi lenei, ina ia maua ai faamanuiaga i le lumana'i. Atonu e lē mafai ona faagalo atoa a tatou mea sesē i le taimi ua te'a. Peita'i, e lē tatau ona oo ai iā i tatou faalogona nofosala. E lē tatau fo'i ona tatou popole i mea ua tuana'i. Nai lo o lea, ia tatou faia le mea sili i le auau-naga iā Ieova, ma taula'i atu i lo tatou lumana'i matagofie.

**17, 18.** (i) O le ā na faia e Paulo ina ia 'alofia ai faalogona nofosala? (ii) E faapefea ona tatou mulimuli i le faa-a'oga a Paulo?



# O TOEAINA—O SE ‘AUFaIGALUEGA MO LO TATOU OLIOLI’

*“O i matou o le  
‘aufaigaluega faatasi  
ma outou mo lo outou  
olioli.”—2 KORI. 1:24.*

---

## SA‘ILI TALI O FESILI NEI:

---

Na faapefea ona faamaonia e Paulo lona lē fia pule i le faatuatua o ona uso, ae o sē e galue mo lo latou olioli?

---

O ā auala e fesoasoani ai toeaina i le faapotopotoga ina ia latou auauna ma le fiafia?

---

E faapefea ona tatou saosao-laumea i le olioli o le faapotopotoga?

NA IAI se fefinaua’iga i le faapotopotoga i Korinito i le 55 T.A. O le alofa o Paulo iā i latou e pei o se tamā i lana fanau, na ia avatu ai se tusi ina ia faasa’o ai le mataupu. (1 Kori. 1:11; 4:15) O lea na auina atu ai e Paulo lana uō o Tito ina ia asiasia i latou, ma aumai se lipoti pe a la feiloa’i i le tau-laga i Teroa. Sa umi ona faatali Paulo i Teroa, peita’i e le’i sau Tito. O lea, na ia malaga ai loa i Maketonia ma feiloa’i ai ma Tito i inā. Na faailoa e Tito iā Paulo le usita’ia e i latou i Korinito o lana fautuaga, ma ua latou naunau e feiloa’i ma ia. Ina ua faalogo Paulo i lenā tala, na ‘atili ai lona olioli.’ —2 Kori. 2:12, 13; 7:5-9.

<sup>2</sup> E le’i leva ona mavae atu lenā mea, ae avatu e Paulo le isi ana tusi i Korinito. “Matou te lē fia pule i lo outou faatuatua, ae o i matou o le ‘aufaigaluega faatasi ma outou mo lo outou olioli, auā o lo outou faatuatua ua outou tutumau ai.” (2 Kori. 1:24) O le ā na uiga i ai Paulo? O le ā se lesonea e a’oa’oina mai ai e toeaina i le faapotopotoga?

## LE OLIOLI MA LE FAATUATUA

<sup>3</sup> Na ta’ua e Paulo uiga e lua e tataua ona faaalua e se Kerisiano, o le faatuatua ma le olioli. Na ia ta’ua muamua le faatuatua ina ua ia tusi: ‘Matou te lē fia pule i lo outou faatuatua, auā o lo outou faatuatua ua outou tutumau ai.’ Na iloa e Paulo,

- 
1. Aiseā na faafiafiaina ai Paulo ona o uso i Korinito?
  2. (i) O le ā na tusi ai Paulo e faatatau i le faatuatua ma le olioli? (ii) O ā fesili o le a tatou iloiloaina?
  3. (i) O le ā na uiga i ai Paulo ina ua ia tusi, “o lo outou faatuatua ua outou tutumau ai”? (ii) E faapefea ona mulimuli toeaina i le faaa’oa’oga a Paulo?

na māfua ona auauna Kerisiano iā Ieova, ona o lo latou lava faatuatua. Na ia mautinoa fo'i, o le alolofa o le 'auuso iā Ieova, sa latou naunau ai e faia le mea sa'o. O le māfuaaga lea na ia lē fia pule ai i lo latou faatuatua. (2 Kori. 2:3) E tatau ona mulimuli toeaina i le faaa'oa'oga a Paulo, e ala i le talitonuina o le faatuatua o uso, faapea le māfuaaga e latou te auauna ai iā Ieova. (2 Tesa. 3:4) E lē tatau ona faia ni tulafono pulepuletutū i le faapotopotoga. Nai lo o lea, ia latou fesoasoani i uso e faia filifiliga mai le Tusi Paia, ma mulimuli i le ta'ita'iga mai le faalapotopotoga a Ieova. E lē o avea toeaina i aso nei ma pule i le faatuatua o o latou uso.—1 Pete. 5:2, 3.

<sup>4</sup> Na faapea mai fo'i Paulo, "o i matou o le 'aufaigaluega faatasi ma outou mo lo outou olioli." O ai na ia faasino atu i ai? Na ia tusi e faatatau i ē na latou galulue faatasi e fesoasoani i le faapotopotoga i Korinito. E faapefea ona tatou iloa? Ona i le tusi lava lea, na ta'ua ai e Paulo nisi o i latou ina ua ia faapea atu: "O Iesu na **matou** tala'ina atu iā te outou, o a'u, ma Siluano, ma Timoteo." (2 Kori. 1:19) E lē gata i lea, ina ua ta'ua e Paulo 'ē na latou galulue faatasi, na ia faasino atu i ē na latou galulue faatasi i le tala'iga e pei o Apolo, Akula, Piseka, Timoteo, Tito ma isi. (Roma 16:3, 21; 1 Kori. 3:6-9; 2 Kori. 8:23) Ina ua faapea atu Paulo "o i matou o le 'aufaigaluega faatasi ma outou mo lo outou olioli," sa ia faamautinoa atu ai i uso i Korinito lo la-

4. (i) O le ā na uiga i ai Paulo ina ua ia tusi, 'o i matou o le 'aufaigaluega mo lo outou olioli'? (ii) E faapefea i toeaina i aso nei ona faata'ita'i i le faaa'oa'oga a Paulo?

tou faanaunauga, ina ia auauna le faapotopotoga i le Atua ma le olioli. O le mea fo'i lenā o loo faia e toeaina i aso nei. O loo latou fesoasoani i uso ina 'ia auauna iā Ieova ma le fafia.'—Sala. 100:2; Fili. 1:25.

<sup>5</sup> Na fesiligia nisi o uso ma tuafāfine maelega mai vaega eseese o le lalolagi i le fesili lenei: 'O ā faaupuga ma gaoioiga a se toeaina e mafai ona e maua ai le olioli?' A o tatou iloiloaina a latou tali, ia mātau pe faapefea i faaupuga ma gaoioiga a toeaina ona faateleina ai lou olioli. E lē gata i lea, ia mafaufau po o le ā e mafai ona tatou faia ina ia maua ai e le faapotopotoga le olioli.\*

### “IA ALOFA ATU IĀ PESETI O LĒ E PELE IĀ I TATOU”

<sup>6</sup> O le to'atele o uso ma tuafāfine e lagona le fafia pe a faaalua le naunau o toeaina iā i latou. O se tasi o auala e mafai ai e toeaina ona faia faapea, o le mulimuli lea i faaa'oa'oga a Tavita, Eliu, ma Iesu. (**Faitau le 2 Samu-elu 9:6; Iopu 33:1; Luka 19:5.**) Na faaalua le manatu mamafa o ia auauna a Ieova i isi tagata, e ala lea i le ta'ua o o latou igoa. Na iloa fo'i e Paulo le tāua o le manatua ma le faaaogāina o igoa o uso ma tuafāfine. I le i'uga o ana tusi, e silia ma le 25 igoa o uso ma tuafāfine

\* Na toe fesiligia nei uso ma tuafāfine e faapea, 'O ā uiga e sili ona e fafia ai i se toeaina?' O le to'atele o i latou na faapea mai, e fafia i toeaina e agalelei ma e faigofie ona talanoa i ai. O le a talanoaina i se mataupu i le lumana'i, le māfuaaga e tāua ai i toeaina ona faaalua na uiga.

5. O le ā o le a tatou iloiloaina, ma aiseā?

6, 7. (i) O le ā se tasi o auala e faata'ita'i ai toeaina iā Iesu, Paulo, faapea isi auauna a le Atua? (ii) Aiseā e fafia ai uso pe a manatuaina o latou igoa?



na ia ta'ua, ma o se tasi o i latou o Peseti. Na faapea mai Paulo e faataataua iā te ia: "Ia alofa atu iā Peseti o lē e pele iā i tatou."—Roma 16:3-15.

<sup>7</sup> E faigatā i nisi toeaina ona manatuaina igoa. Ae pe a latou taumafai e faia faapea, e iloa ai e uso ma tuafāfine o loo latou manatu mamafa iā i latou. (Eso. 33:17) E fialia uso pe a faaaogā e toeaina o latou igoa i le Su'esu'ega o le *Olomatomata*, po o isi fo'i vaega o le sauniga.—Faatusatusa i le Ioane 10:3.

### **"NA GALUE MA LE FILIGĀ O IA O SE SOO O LE ALII"**

<sup>8</sup> Na faaalua e Paulo lona manatu mamafa i isi e ala i le avatu o le faamālō iā i latou. O se tasi lenā o auala e fesoasoani ai toeaina i uso ina ia auauna i le Atua ma le fialia. Ina ua tusi atu Paulo i uso i Korinito, na ia faapea atu: "Ua ou matuā mimita e uiga iā te outou." (2 Kori. 7:4) E mautinoa na faalaeiauina le faapotopotoga i Korinito i upu a Paulo. E lē gata i lea, na faamālō atu fo'i Paulo i isi faapotopotoga mo galuega lelei. (Roma 1:8; Fili. 1:3-5; 1 Tesa. 1:8) Ina ua mae'a ona ta'ua e Paulo Peseti i lana tusi i Roma, ona ia toe faaopopo atu lea e faapea, "na galue ma le filigā o ia o se soo o le Alii." (Roma 16:12) Ma'eu le faalaeiauina o Peseti ina ua ia faalogo i na upu. Na faata'ita'i Paulo iā Ieova ma Iesu, e ala i lona viivii o isi.—*Faitau le Mareko 1:9-11; Ioane 1:47; Faaa. 2:2, 13, 19.*

<sup>9</sup> E iloa fo'i e toeaina i aso nei le tāua

---

**8.** O le ā se tasi o auala na faata'ita'i ai Paulo iā Ieova ma Iesu?

**9.** E faapefea ona maua e le faapotopotoga le fialia pe a avatu e toeaina le faamālō?

o le faaali atu i uso o le lototalisapaia, e ala i a latou faaupuga. (Faata. 3:27; 15:23) Pe a avatu e toeaina le faamālō i uso, e faailoa atu ai lo latou manatu mamafa iā i latou. E naunau fo'i uso e maua faalaeiauga mai toeaina. Na faapea mai se tuafafine ua silia ma le 50 tausaga lona matua: "E lē taitai faamālō mai nisi mo a'u galuega mamafa i le fale faigaluega, ona o le taatele o le agaga faatautavā. O lea, ou te lagona le fialia pe a faamālō mai se toeaina iā te a'u. Ou te lagona ai le alofagia o a'u e lo'u Tamā faalelagi." Na faapea mai se uso ma o se matua nofo to'atasi o loo tausia a'e se fanau e to'alua, e masani ona faailoa atu e se toeaina iā te ia lona talisapaia o ana galuega. Na matuā faalaeiauina o ia i faamatalaga a le toeaina, ina ia faia pea le mea sili i le auaunaga i le Atua. E atagia mai ai, pe a faamālō atu toeaina i uso ma tuafāfine, o le a fesoasoani ai iā i latou e auauna i le Atua ma le olioli, ma "lē taitai lē lavavā ai."—Isa. 40:31.

### **"IA LEOLEO LE FAAPOTOPOTOGA"**

<sup>10</sup> O le ā se tasi o auala tāua e faaali ai e toeaina le alofa i uso, ma fesoasoani iā i latou e auauna iā Ieova ma le fialia? E ala lea i le vave avatu o le fesoasoani iā i latou o loo mana'omia faalaeiauga. (*Faitau le Galuega 20:28.*) O le faia faapea, ua latou faata'ita'i ai i auauna faamaoni a Ieova i taimi o le Tusi Paia. O se faata'ita'iga, na faalaeiauina e Neemia ona uso Iutaia ina ua ia mātatauina lo latou faavaivai. (Nee. 4:14) Ua faapena fo'i ona

---

**10, 11.** (i) E faapefea ona faata'ita'i toeaina iā Neemia? (ii) E faapefea ona faamalosia e toeaina uso ma tuafāfine pe a asiasia i latou?



E fesoasoani sauniuniga lelei i toeaia i le avatuina o “meaalofa faaleagaga,” i taimi o asiasiga faaleoleo mamoe

faia taumafaiga a toeaia e faamalositia atili le faatuatua o o latou uso. E avatu e toeaia iā i latou se “meaalofa faaleagaga,” i taimi o a latou asiasiga faaleoleo mamoe. (Roma 1:11) E faapefea ona faia e toeaia lenā mea?

<sup>11</sup> E tatau ona mafau fau muamua toeaia i tulaga o i latou ua fuafua e asia. O se faata’ita’iga, ia fesili ifo: ‘O ā ni faigatā o loo fesaga’ia e lea uso? O ā ni manatu e mafai ona faalaeiauina ai o ia? O ā ni mau ma ni tala mai le Tusi Paia e fetui lelei ma lona tulaga?’ A faia faapea e se toeaia, o le a mafai ona ia faia ni faamatalaga e faalaeiauina ai lea uso, nai lo o le tauina talanoa faasamasamanoa. A o faia lana asiasiga, ia faalogologo lelei a o talanoa mai le uso po o le tuafafine. (Iako. 1:19) Na faapea mai se tasi tuafafine: “E matuā faalaeiauina a’u pe a faalogologo lelei se toeaia, a o o’u talanoa atu iā te ia.”—Luka 8:18.

<sup>12</sup> O ai e mana’omia faalaeiauga? Na faalaeiauina e Paulo toeaia ina ia ua’i atu i le “lafu mamoe **uma**.” O lea, e mana’omia e sui **uma** o le faapotopotoga faalaeiauga, e oo lava i tagata tala’i po o paeonia o loo auauna faamaoni mo le tele o tausaga. Aiseā e latou te mana’omia ai faalaeiauga mai toeaia? E ui i le malosi o lo latou faatuatua iā Ieova, ae e iai taimi e faigatā ai ona latou onosaia faafitauli mai le lalolagi a Satani. E latou te mana’omia le fesoasoani, e pei fo’i o le tupu o Tavita i taimi na lamatia ai lona ola.

#### ‘UA FESOASOANI APISAI IĀ TE IA’

<sup>13</sup> E le’i umi ona faauuina Tavita e aveia ma tupu, ae la tau loa ma Koliata, o se sau’ai mai le ituaiga o Rafaimi. Na

<sup>12.</sup> O ai i le faapotopotoga e mana’omia faalaeiauga, ma aiseā?

<sup>13.</sup> (i) O le ā le taimi na taumafai Isepenopa e fasioitia ai Tavita? (ii) Aiseā na fetui lelei ai le taimi na fesoasoani ai Apisai iā Tavita?

lototele Tavita ma ia fasiotia ai le sau-  
 'ai. (1 Samu. 17:4, 48-51; 1 No. 20:5, 8)  
 Ina ua mavae ni tausaga, ona toe tau  
 lea o Filisitia ma Isaraelu. I inā, na toe  
 tau ai Tavita ma se isi sau'ai, o lona  
 igoa o Isepenopa, e mai le ituaiga fo'i  
 o Rafaimi. (2 Samu. 21:16) Peita'i, na  
 toeitiiti lava fasiotia ai Tavita. Aiseā?  
 E le'i faapea ua palaai Tavita, peita'i,  
 ua faapea mai le Tusi Paia, 'ua oo ina  
 vaivai o ia.' Ina ua iloa e Isepenopa  
 ua vaivai Tavita, ona ia taumafai loa  
 lea e fasiotia o ia. Peita'i, na 'faavave  
 atu Apisai' ma fesoasoani iā Tavita ma  
 fasiotia ai le Filisitia. (2 Samu. 21:15-  
 17) Ma'eu lona lotofaafetai iā Apisai,  
 ona o lana fesoasoani na faasaoina ai  
 lona ola. O le ā e tatou te a'oa'oina mai  
 i lenā tala?

<sup>14</sup> O loo faaauau pea ona tatou au-  
 auna iā Ieova, e ui i lu'i mai iā Sa-  
 tani ma ē tete mai. O nisi o i tatou  
 e feagai ma faafitauli e pei o ni mauga  
 tetele. Peita'i, e tatou te maufaatua-  
 tuaina atoatoa Ieova. E lē gata i lea, e  
 tatou te maua fo'i le malosi e tumau  
 faamaoni ai e ui i faigatā. O le malosi  
 fo'i lenā na fasiotia ai e Tavita Koliata.  
 Peita'i, e iai taimi e tatou te manatu  
 ai ua leai so tatou malosi e tete atu  
 ai i le lalolagi a Satani. E faigofie ona  
 faavaivaia ai i tatou, e ui o faafitauli  
 e mafai ona tatou taulimaina. I taimi  
 faapena, o faalaeiauga mai toeaina e  
 mafai ona tatou faaauau ai i le auau-  
 naga iā Ieova ma le fiasia. Na ta'ua e  
 se tuafafine paeonia ua silia ma le 60  
 ona tausaga e faapea: "E iai le taimi  
 na ou ma'i ma faavaivai ai i le tala'iga.

14. (i) O le ā e fesoasoani iā i tatou e tumau  
 faamaoni ai i taimi faigatā? (ii) E faapefea ona  
 fesoasoani toeaina i isi ina ia tumau faamaoni,  
 ma toe maua le fiasia? Aumai se faata'ita'iga.

Na talanoa mai se toeaina iā te a'u, ina  
 ua ia maitauina lea tulaga. Na faalaei-  
 auina a'u i la ma talanoaga faale-Tusi  
 Paia. Na ou maua aogā ina ua ou faa-  
 tatauina fautuaga na tuuina mai." Na  
 ia toe faaopoopo mai: "Ma'eu le alofa  
 o lea toeaina, ina ua ia maitauina lo'u  
 vaivai ma tuuina mai le fesoasoani." E  
 mata'ina le iai o toeaina e nofosauni  
 e fesoasoani mai, e pei ona nofosauni  
 Apisai e fesoasoani iā Tavita.

### 'IA OUTOU ILOA LO'U ALOFA'

<sup>15</sup> O toeaina o ni ē e galulue ma-  
 mafa. O nisi taimi e latou te lē momoe  
 ona o le popole i o latou uso ma tuafā-  
 fine. Pe atonu fo'i e toe feala i le leva o  
 le pō e tatalo mo i latou, pe ave fo'i i ai  
 le fesoasoani pe a mana'omia. (2 Kori.  
 11:27, 28) E pei o Paulo, e fiasia toeaina  
 e fesoasoani i isi. Na ia tusi atu iā i la-  
 tou i Korinito e faapea: "Ua ou naunau  
 tele e faaagā mea uma ua iā te a'u,  
 ma lo'u malosi atoa ona o o outou ola."  
 (2 Kori. 12:15) O le alofa o Paulo i ona  
 uso, na ia faaalu ai lona malosi e fesoas-  
 oani ai iā i latou. (*Faitau le 2 Korinito*  
 2:4; Fili. 2:17; 1 Tesa. 2:8) O le māfua-  
 aga lea na alofagia ai e le 'auso Paulo.  
 —Galu. 20:31-38.

<sup>16</sup> E tatou te alolofa fo'i i toeaina,  
 ma faafetaia Ieova mo le foa'iina mai o  
 i latou. E tatou te lagona le fiasia ona  
 e latou te manatu mamafa ma asiasia  
 i tatou pe a mana'omia le fesoasoani.  
 E tatou te faafetaia fo'i i latou, ona o le  
 nofosauni e fesoasoani mai i taimi e  
 tatou te aafia ai i faafitauli. O le mea  
 moni, o toeaina, o ni ē galulue malo-  
 losi mo lo tatou olioli.

15, 16. (i) Aiseā na alofagia ai e uso Paulo?  
 (ii) Aiseā e tatou te alolofa ai i toeaina?



# Aogā o le Mataalia i Galuega Lelei

O María Isabel o se talavou e maelega i le galuega tala'i. E nofo i le aai o San Bernardo i Chile, i Amerika i Saute. O lona aiga o ni tagata o le itu-aiga o Mapuche. E matuā lagolagoina e lona aiga taumafaiga ina ia faatū se faapotopotoga fou i le gagana Mapuche, lea e ta'ua o le Mapudungun.

Sa manatunatu María i sana gaoioiga o le a fai, ina ua faasilasila o le a faia le Faamanatuga i le gagana Mapudungun, ma o le a tufatufaina ai valaaulia e 2,000. E na te manatuaina i'uga lelei sa maua e isi talavou na molimau atu i tamaiti a'oga ma faia'oga. O lea, na ia talatalanoa ai loa i ona mātua, ma mafaufau i se auala e tufatufaina ai nei valaaulia i le a'oga.

Sa talosaga muamua María Isabel i le pule a'oga mo le faatagaga, e faapipii ai se pepa valaaulia i le faitoto'a e ulufale atu ai i le a'oga. Na talia le talosaga, ma sa faafetaia o ia ona o lona mataalia i le faia o galuega lelei. Na faasilasila e le pule a'oga le pepa valaaulia, ina ua fai le tauvalaauga a le a'oga i se tasi taeao.

Sa talia lana talosaga e asiasi atu i vasega ta'i-tasi, ma na ia sa'ilia fo'i ni tamaiti Mapuche. Na ia faapea mai: "Sa ou manatu, atonu e na o se to'a 10 pe 15 tamaiti Mapuche i le a'oga atoa. Ae na faato'a ou iloa mulimuli ane e to'atele i latou, ma e 150 valaaulia sa ou tufatufaina."

## NA IA FAATALITALIA SE TAGATA MATUA

Sa faitauina e se tasi o fafine le valaaulia sa faapipii i le faitoto'a o le a'oga. O lea, sa ia sa'ilia ai se tasi e na te faamatalaina le uiga o lenei sauniga faapitoa. E le'i mafaufau le fafine o le a ia talanoa i se teineitiiti e 10 tausaga. Na faapea mai María Isabel, na faatalitalia e le fafine o le a ia talanoa i se tagata matua. E ui i lea, sa la talatalanoa puupuu e faatatau i le valaaulia. Na fesiligia fo'i e María le mea e nofo ai le fafine, ina ia mafai ona latou toe asia ma ona mātua o ia, ma talanoa atili ai e faatatau i le Malo o le Atua. Na matuā faafiafiaina tagata tala'i e to'a 20 e tautatala i le gagana Mapudungun, ina ua vaaia i le Faamanatuga, lea fafine faatasi ai ma isi tagata Mapuche e to'a 26. O loo olaola pea lenei faapotopotoga!

Pe e pei i tatou o lenei talavou i le mataalia e faia galuega lelei? Pe mafai ona tatou valaaulia ē tatou te a'o'oga pe faigaluega faatasi i le Faamanatuga, lauga lautele, pe i se tauaofiaga fo'i? O le su'esu'e loloto i a tatou lomiga, o le a maua ai auala e faia ai faapea. Ia talosaga fo'i mo le agaga paia o leova, e maua ai le lototele e talanoa atu i isi e faatatau iā te ia. (Luka 11:13) O le a tauia au taumafaiga pe a e faia faapea, ma o le a faalaeiauina ai oe.